


Anmontan

Dann

Lerwa

Printed by SPACE



An Montan
DANM LERWA
Jean-Joseph Madeleine

Lenstiti Kreol Lans-O-Pen
Enprimen par PRINTEC VIKTORIA

© 1993 Lenstiti Kreol

NOT LO LOTER

JEAN-JOSEPH MADELEINE ti ne le 29 Zanvye, 1956, Grant Ans Mae, kot i'n osi swiv son letid.

I annan kat zanfán e i travay dan seksyon ledikasyon fizik, dan Minister Ledikasyon. Son bann pastan i enkli ekrir e fer karate.

Apar sa roman 'An montan Danm Lerwa', Jean-Joseph in osi ekri plizyer zistwar kourt, poenm ek pyes teat. Enn son zistwar kourt, 'Zanmen ankor' i figire dan dezyenm volim zistwar kourt, pibliye an 1991.

Lezot louvraz ki i'n deza ekri i konpri zistwar kourt 'Mon lavi', roman 'Lanmour pa zanmen fini', pyes teat 'Mon zanmi Anri' e plizyer ankor.

Lentere Jean-Joseph pour ekrir ti konmans apre ki Kreol ti'n ganny rekonnet konman en lalang isi Sesel. I santi ki ekrir i ed li fer resorti son bann santiman.

LENTRODIKSYON

Soley pe tonbe, Remon i an montan pour al revwar son fanmiy ki i'n kite depi bomaten. Pli ba kot Anzel kliyan in konmans koste lakour e Anzel pe vann son baka.

... En lasenn tipik Danm Lerwa. En lanmok i vin de, de i vin trwa. Apre trwa latet i vire, rimer i konmanse. Sanmenm sa ki Anzel i kontan! E i fer tou pour trenn Anzel kot Bib, sa grannwanr ki swadizan konn tou.

Kimannyer tousala pou fini?

An montan Danm Lerwa, en kantite levennman i esper ou. En roman ekri dan stil inik Jean-Joseph Madeleine. En roman ki mon asire ou pa pou oule met ater enn fwa ou'n konmans lir.

An Montan Danm Lerwa

Soley pe kabannen pour disparet ankor en fwa dan lorizon. Laklos pe prepar li pour ganny bate dan enn er-d-tan ven minit. An montan, en zonm trant an dan en semiz ver avek en kannson kaki, en sak are rouz ek ble dan son lanmen. Lo son lapo nwar delo pe vide. Ou tann zis son soulye nilon kot pe kraz fey prin sek Danm Lerwa. I pa ni vire pour gete menm si ler i pas kot lakaz enn son bann dalon ki abitye ofer li en sopin labyer e menm kalou. I'n met son latet kot son lakour personn pa pour vir li. Parey mile laronn, zis en lasenn ki pou kapab aret li. Son mazinasyon in plonz dan son zarden ek son trwa dimoun ki i ti kit kot li bomaten sis er edmi. Dwatet konmela zot pe esper li. I ti kile e parfwa menm desir bann brans prin ki ti'n kabann dan semen.

Lo en pti montanny en lakaz an blok in byen plase. La anler ou kapab war byen obor lanmer e menm tann laklos legliz Be Lazar kan i sonn sa zoli son sis er ek laklos pour lanmes. Ou menm kapab tann bis Tata ler i arete e demare.

Otour lakaz tou legim ek fler ki ou bezwen ou a gannyen. Fler pe riye dan sa bon pti ler divan. Zot fek ganny byen mouye e prezan Zan pe aroz son dernyen bed sou avan son papa i arive pour li gete ki i'n anmenn pour zot de Marta ozordi. Zan dan son

dis an i ed byen son papa kot lakour. Kot aroze i konsernen pa trakase sa pour li, tandiski pyose pa son zafer.

I fini aroze i al pran son plas lo ban anba langar kot Zozefin pe penny latet son pti ser. Anba sa menm langar ki zot pas plizyer zot letan lazournen, la zot osi debiste en pe partou partou e menm war kan Remon i pran dernyen pti monte pour antre kot lakour. Sa langar kouver an fey lantannyen i konn plizyer keksoz ki'n pase dan sa fanmiy, i konn menm gou fer lanmour dan lalin kler.

La lo ban tou lizye pe fikse anba dan mayok kot touf prin i fini. Wi i ankore mank enn parmi pour konplet zot e zot pe vey li kan i a penetre sa dernyen touf prin-de-frans nenport ki moman. Parfwa lake seve Marta ti tres lanver, redetrese. Tou le trwa ti'n parey zanfane malelve kan zot tann granmoun pe tir manze. Kot zot ti'n asize zot ti san pozisyon. Zis lapat ban ki ti pe koz avek kanmarad.

En kou an gran en zonm avek en semiz ver lo son zepol i penetre touf prin avek en sak dan son lanmen. Son lestoma in klate kot i monte dan mayok latet anba. Zot ti pe tro veye e la prezan sa de ki zot lizye ti pe get plis dan touf prin pa ankore kapab konpran lekel sa zonm.

Latet Marta ti'n ganny lape pour en moman, zis li ki personn pa pou anbet li, i konn son disan. I leve kot i ete, sot de fwa e kriy a ot vwa, "La papa, la papa i vini, papa i vini." Avek sa kriye sa de ki lizye ti'n sonm ti revwar kler. Zot leker ti donn en sourir zot figir e ti soulaz zot fes lo ban ek sez.

Alafen sa moman ki zot ti pe espere in arive. Sa moman silans in fini kot lakour, sa tapaz fey prin kraze, bann brans desire tou in fini.

"Bonswar, bonswar," en lavwa byen fatigue mouye dan transpirasyon i dir,

"Bonswar papa, Bonswar mon ker," Zozefin ek zanfane reponn.

"Konman zot sava?"

"Nou byen ou menm, konman ou'n pas sa lazournen? Zozefin i demann ankore,

"Parey tou le zour, fatigue." Zozefin i al prepar en pe delo so pour son mari. I pa pou tarde. Son delo lontan i dan termos. I ti'n bwi depi i ti'n fini kwi dinen.

Dan sa letan sa de marmay in pran sakenn en kote lebra fotey kot zot papa ti pe les li fre pour bwar son kafe. Zane ek Marta i profite pour fer en pe kokot zot papa pour li tir sa ki dan sak. Sa zot labitid. Sa ki rod servyet pour swiy figir, sa ki pran soulye pour met dan lasanmben - ziska fon sak i forse monte e lafatig i disparet, kafe i vin tro fre.

Parey son labitid kan i'n fini byen poze e ekout sa ki zansla kot lakour i annan pour dir, i al rann en pti vizit son zarden. Ozordi i'n tro tar pour tyonbo pyos. Dan pye sandragon marten in konmans fer zot lapriyer. Soley in donn en zoli kouler dan lorizon kot i pe disparet deryer lapwent zil Terez kote Porglo.

"Zozefin anmenn en pti labyer pour mwan."

"Mon pe benny Marta. Sot en kou pran, dwatet in byen fre, mon ti'n met zot anler. Okontrer tir limonnad met anba pangar zot a kaye."

"O.K. fanm."

Pa tou le zour me souvan apre ki tou travay kot lakour ti'n konplete. Remon ti tap enn de pti labyer e zot koz koze ziska tar anba langar kan program televizyon pa enteres zot. Zane ek

Marta i al dormi zis apre nouvel 7^{er} pour zot lev ase boner pour al lekòl. Lannen prosenn Marta pou al dan P2. Zan i vey byen son pti ser kan zot al lekòl e kan zot pe retourn kot lakour e i osi ed li avek son travay lakour.

Lannwit i pase, en nouvo i zour i arive. En zour nouvo ki ranpli avek botan. Marmay in al lekòl e Remon in rebran son travay lo laferm Ans Lanmous. I'n fini fer lapel e plas tou bann travayer dan zot louvraz.

Son asistan Marsel prezan pe fer sir ki tou keksoz i deroul parey administrater in dir. I konnen ki Remon pa en move administrater me i pa toler pares ek negligans, tandiski Remon osi i konnen ki Marsel pa pou grat leren avek person e i osi pli sever ki li. Sa konfyans i donn li sans pour travay an pe dan son biro e fer son kont legim ki SMB i pran de fwa par semenn.

Ozordi i annan plis travay. Son sekreter pa'n vin travay. I pou bezwen tip limenn e resevwar bann telefonn ki antre.

I annandezour ki Flosi pa vin travay. Si i vini demen i pou bezwen prodwir en sertifika valab ouswa en bon leskiz. Otreman i pou bezwen kit travay. Menm si Remon son bofrer i pa pou kapab soutir en dimoun ki mank travay sak fwa ki i annan bal dan sant sosyal. Trwa zour i pa vin travay zis akòz i'n tro anmize e son lekor pa donner.

Lesyel i ble. Soley dis er pe tir delo dan lekor zonm ek fanm dan karo sou. Fey ponmdanmour in flettri, tiyo delo pe ouver fermen tou le senk minit. Marsel in pran lo en ros anba en pti pye koko, i nepli kapab fer latet avek lasaler. Son gran sapo lapay nepli servi. I ankòr tro zenn pour les son lapo blan brile dan sa

gro soley e apre tou, Politeknik i pa ti aprann dan en tel lasaler.

En minimok i aret zis dan lale e en zenn fiy 22 an i debarke. I fer salanm drayver, i pran lale direksyon kot biro Remon. Bann travayer pa antren li, me Marsel pa pou les li al koumsa.

“Zot! omwen dir bonzour. Ou pas la obor mwan,” Marsel i dir.

“Kisa ou lafen, ou pa'n anmenn manze ozordi?”

“Mon'n anmenn manze me dan letan ki nou pa ti ansanm yer swar e i fer trwa zour ki ou pa'n vin travay.”

“Kote ki fermal avek ou kan mon pa vin travay? Mon'n anmenn mon lasyet kot ou pour ranpli?”

“Mersi bokou mon bourzwa. Pa bat mwan.”

“Mon pa ganny drwa bat person mwan, aret vey mon lokipasyon.”

“Mersi manmzel.”

“Be mwan manmzel menm mwan, ki ou ti krwar?”

Marsel i reste trankil pour pa fer parol pli long. Bann travayer i dres zot latet e met zot lanmen devan labous avek en lenpresyon sezisman lo zot figir par sa bann repons ensolan. Me sa swadizan manmzel i kontiny son semen an balansan son gran zip ver en pe plis.

Kan i antre dan biro i fer son soulye kriy en pe pli for, konmsi i pe antre dan disko. Son latab i ranpli avek bann papye pour tipe. Sa louvraz depi Lendi e bann ki i pa'n fini depi semenn pase.

I zis get zot an filan lalev dan zot direksyon. I vir dan direksyon Remon an dizan, “Alo, ou bizi menm la.”

“Bonzour Flosi, lontan mon pe esper ou.”

“Ki'n arive?”

“Pa’n ariv naryen. I annan en kantite louveraz pour tipe e mon tousel mon pa pou kapab fer tou. I fer trwa zour ki ou pa vin travay.”

“Be mon ti malad mon pa’n kapab vini.”

“I byen, me ou ti kapab anvoy en konmisyon avek en dimoun e menm tou le bomaten mon pas obor zot lakour, en dimoun ti kapab dir mwan.”

“A, nou pa’n war ou nou.”

“Bon, oli ou papye dokter?”

“Mon pa’n al kot okenn dokter mwan.”

“Me mon ser mon pa pou kapab soutir ou tou le zour. Ou a fer mwan perdi mon bouse manze.”

“Kimannyer mon pou fer ou perdi ou bouse manze?”

“Flosi, de fwa par mwan, ou mank travay san en rezon. Si mon sef i konnen, ki mon pou kapab fer? E bann travayer osi zot trouve. Si zot fer parey, ki mon pou dir zot? Ou ti devret realize ki nou ki devret donn bon legzanp. Mon pa anvi pous ou mwan, me ou konnen ki dan tou travay i bezwen annan disiplin. Mon pa kapab protez ou e afekte mon demen. Ou’n mank travay trwa zour san leskiz, ladan menm ou’n mal koz avek ou siperyer. Mon pa pou kapab kontinyen soutir sa.”

“Kimannyer mon pou koze? Mon pa ou fanm mwan.”

“Egzakteman Flosi, mon pa ankore fini koz avek ou, menm la ou anba lenfliyans lalkol.”

“Be wi, mon ti bwar avek ou.”

“Ou tande? Koumsa i koze,” an rantran Marsel i dir.

“Ou bous ou, pa ou zafer.”

Sa dernyen repons Flosi i mont karakter Remon en pe plis.

“Manmzel Flosi al kot ou ziska nouvo lord.”

“Pa fer naryen, mon pa pou mor lafen. Pa ou ki ti montre mwan manze.” I leve e tap laport byen for. Remon ek Marsel i kontinyen koz lo son konportman degradan.

“Marsel nou pou bezwen pran en desizyon lo sa ki’n arive. Mon pa pou kapab les en tel aksyon parey. Fer en rapor e mon a met avek pour mwan. Mon a anvoy kot Sekreter Prensipal e nou a esper son desizyon.”

Obor semen en minimok zonn ek en loto blan in park. De gard ek en zenn garson pe debout akote. Sa zenn garson pe argimant avek sa de gard an montran ledwa dan direksyon Flosi ki ankore pe vini dan lale.

Flosi i remarke ki sa i de gard Belazar e sa zenn garson Zanbatis ki ti fek debark li taler. Zanbatis ti swadizan pe al rod ankore en boutey ronm blan laboutik Ans Lanmous pour zot al kontinyen bwar lo lans.

“Be la ki i pe fer avek sa de gard? Ou a dir mwan i pa’n al tap kek dimoun?” Flosi i mazine.

“Limenm ki ou bezwen?” Serzan i demann Zanbatis avek en lotorite.

“Wi, limenm.”

“Degaze madanm nou annan louveraz pour fer.”

“Be, mon pa bezwen gard mwan.”

“Non, pa nou ki bezwen ou sa garson,” sa lot zofisye lapolis i eksplike.

“La mon araze, ki i’n fer zot ankore?”

“Demann li,” Serzan i reponn.

“Mon pa’n fer naryen, me zot dir mon sou.”

“Byensir ou sou e menm dokter in dir ou sou. Nou pou ferm ou,” Serzan i azoute.

“Si zot ferm li, zot a ferm mwan osi.”

“Pa rode ou, depi yer swar zot sou dan sa minimok e zot ti pe fer en pake tapaz tou lannwit e enteronp lape piblik,” sa gard i dir.

“Fer sa ki zot anvi, lalwa i dan zot lanmen,” Flosi i reponn.

Serzan ek sa lot gard i met lanmen lo Zanbatis e diriz kot loto. Flosi i tir son soulye gran talon i donn Serzan en kou avek dan son latet an dizan, "Larg li." Sa lot gard i met lanmen lo manmzel osi e atas li avek minimok dan minot.

Zot fini met Zanbatis dan loto. Serzan i tir son kasket e pas lanmen dan son latet pour get son domaz. Erezman pa'n kase. Son kasket in protez li.

Serzan i anbank dan loto avek Zanbatis ek son dalon dan minimok avek gran manmzel, zot diriz ver kordgard Belazar.

Arivan kordgard Serzan i fer tou bann prosedir e i met zot sakenn dan en kaso. I telefonn manman Flosi pour enform li ki son fiy in ganny arete. Serzan i konn Madanm Edwar byen e plizyer fwa i'n al fer lafouy baka kot li. Madanm Edwar i ase popiler dan leo Belazar avek son baka enn pa ase de tro bokou e bann diskisyon ki arive kot li tanzantan.

I pa demande ki Per i dir, i pas en rob pli prop lo li e i desann kordgard. I bon degre. Depi bomaten i'n konmans tap son enn kan i ti al met disik. La i'n kit bann dimoun pe bwar anba langar. Edwar a get zot letan i pe pyose dan son bitasyon. Apre tou Edwar pa pou mel dan sa bann zafer. I'n fatigue koz avek Flosi.

Flosi fek zour li yer swar kan i ti pe sey koz avek li konsernan absant lakour e fason ki i bwar dan semen. Serzan ek Edwar zot de dalon lapas dan Sanmdi swar. Zot touzour diskrit lo bann problem zot distrik ek problem sosyal lafanmiy kan pwason pa tro morde.

Zot pli gran kozri i lo bann dimoun ki konsonm lalkol an ekse e sirtou bann zenn ki pe afekte zot lavenir dan bwar ek drog.

"Bonzour konstab, oli Serzan?"

"Bonzour Madanm, mon kapab ed ou? Serzan i okipe."

"Mon pa bezwen ou. Mon bezwen sa ki'n telefonn mwan."

"Eskize madanm, mon pa ti konnen si ou ti annan en randevou

avek li. Mon a kriy li en moman. Asiz touzour."

"Mon pa'n vin asize isi, mon annan louvraz kot mwan."

Sa gard pa dir plis ki sa. I lev telefonn i telefonn serzan.

"Alo," Serzan i reponn.

"Serzan i annan en madanm ki anvi war ou."

"Dir li si pa tro irzan esper mwan en pti moman aköz mon pe dezennen. Zis kan mon fini mon a vin war li."

"Madanm, i dir ou i pe dezennen. Zis kan i a fini i a vin war ou."

"Ki sa, li i pou manze e mwan mon pour esper li? Gouvernman pa in dir ki lapolis i travay vennkat er lo vennkat er?"

"Madanm pa bezwen fer tapaz, i fek ale."

"Pa fer tapaz? Mon kapab pa fer tapaz zot in met mon piti dan kaso? Ki sa zot mank fanm?"

Sa tapaz ti fors Serzan kit son manze pour vin war ki pe arive.

"Tyonbo en pe tapaz. Ki pe arive la?"

"Ki pe arive? Mon vin sers mon piti kot ou."

"Madanm Edwar pa bezwen ou fer tou sa tapaz. Koz avek nou parey dimoun i devret koz avek son kanmarad. Ou napa drwa kriye koumsa dan en kordgard e si ou pa arete mon a ferm ou osi."

"Ferm mwan, zot a ganny sakenn en fanm."

"Nou pa bezwen okenn fanm madanm, e ou pa pou vin fer nou per."

Sa dernyen mo serzan i fer Anzel anmas son lake. Prezan i war ki i pa pou kapab persiste. Zafer pe al mal. Sa fason ki sa zonn pe koze, konmsi vre i a met li dan kaso. Anzel i met son fes lo sez. Konmsi i ti'n anvoy en ros dan en nik mous zonn. Serzan i pran lokirans i met devan li.

"Wi madanm. Ou menm ki ti'n vin war mwan?"

"Non, mon ti'n vin gete ki Flosi in fer pour zot met li dan kaso,"

dan en ton tou kanmi kanmi Anzel i dir.

“Alors pour sa ki ou bezwen fer tou sa tapaz e fors mwan kit mon manze?” Serzan in fer son moustas red konmsi gidon bisiklet e i kontinyen, “Sak fwa ou piti i fer en sarz nou pou bezwen aret li. Pa krwar ki ou pou anpes nou fer nou louveraz. Ou annan toupe e ou pa konn koz avek dimoun. Ou soutirez. Letan zot in bwar zot pa reflesir ki zot dir kan zot koz avek zot kanmarad. Ou piti in fer lofans e lalwa in aret li. Demen bomaten i pou pas an kour.

“Zot be ki i’n fer ankor Serzan?”

“I sou parey ou e i’n lager avek lapolis.”

“Ar zot Senmyer, yer swar son papa fek pe koz avek li lo sa lavi bwar e antre tar kot lakour. La i’n fer mwan ganny gro latet dan kordgard. La mon pa konnen ki mon pou dir son papa. Edwar pou dispit avek mwan ankor. La i pou dir mwan ki tro donn pye sa piti.” Tou kanmi, Madanm Edwar i sorti dan kordgard i mont kot li.

* * * * *

Soulezon avek sa soley 1 er 30, i anmenn sa de zenn dan en profon sonmey dan kaso. Yer swar zot in mal dormi. Lafebles osi pe zwe son rol. Serzan in fer donn zot en pe manze me zot in zis goute. Dan sa leta zot pa menm kapab santi loder delwil. Zot dernyen repa ti Sanmdi apremidi. Divan in fini pran plas. Kot zot in alonze lo sa morso fom, zot in tou tranpe avek lasyer frwad ki pe vide lo zot lekor antye konmsi zot in mal mor. Dan zot vant divan pe ronfle parey laroul dan brizan. Zot pa tann naryen ki pe pase.

En tapaz dan lakwizin.

“Ou a dir mwan Edwar ki pe sanz larzan? Be non. La Edwar i dan bitasyon. Kisennla ki kapab antre dan mon lakwizin? Pa kapab Edme. Kat er pa ankor sonnen. Mon larzan mon ti’n bliy lo bife. Ar mon Dye.”

Madanm Edwar i aforsi lepa. I desann peron ki sorti dan semen vitman e ariv dan lari. I pa pou ganny letan al dan lakaz. Sa tapaz in fatig son latet plis. Son bwat larzan, son bidon baka. Laport ki i ti’n fermen i ouver. I antre e get direk lo bife. Napa bwat larzan. I lev lavann ki i ti’n kouper son bidon. Bidon i vid. I vire e sot deor pour kriy Edwar. Kekfwa li Edwar i konnen ki’n arive. Anmenmtan i mars lo en keksoz mou. I lev son lipye vitman.

“Sorti sat. Taler mon a pet ou vant.” I vire pour redonn en lot kou-d-pye Milou. Mepa Milou. I tonm asize ler i war ki son kaba ki i’n mars lo la.

“Mon kaba ti dan komod. Mon ti fek sanz larzan sa de zonm taler. Mon larzan pour aste mon televizyon ti ladan, mon larzan konmisyon, larzan bennzin Edwar, ki mon pou fer?”

I desoule. I pran en gran lespirasyon e dres debout. I diriz dan lakaz e sorti par laport ki vir avek semen. Dan semen napa person, ni sa loto ki sa de zonm ti’n vin ladan. Prezan i mazinen ki i ti kit dimoun anba langar pe bwar ler i ti desann. La zot in ale napa person pour li demande si zot pa’n war ki’n arive. Petet Edwar. Non, i pa pou kapab bouz Edwar konmela, Edwar pa ti pou zet son baka pa pou fouy dan son komod. I pa pou enterfer avek son bann tranzaksyon. I bezwen pran en desizyon avan i tro tar. I asiz lo peron devan lavarang, son latet bese e lanmen pe zwe

avek son lake seve. I mazine pour telefonn lapolis apre i sanz son nide.

“Mon pa pou kapab al bouz Serzan ankore. Mon fek al fer li ankore, i pa pou ekoute. I pou krwar mon pe rod en lot zafer ankore. Apre kimannyer mon pou kapab eksplike ki mon ti kit dimoun pe bwar kot mwan? Be ki mon pou fer? Ki mon pou dir Edwar? Mon Bondye ed mwan. Non, Edwar pa en leopar. Mon a kriy li, mon a demann li aköz i pa ti vin get lakour letan mon pa ti la. Apre tou mwan ki konmande kot sa lakaz.

Avan kriy Edwar, Anzel i al dan ta lapo koko avek son seo plastik. I lev en vye fey tol ki i ti’n kouper son pli gro bidon. I ranpli sa seo e i al ranplas son bidon pangar son mari a remarke ki i ti’n perdi baka osi.

Apre i mont lo ros kot i kapab war byen Edwar kot pe pyose anler dan bitasyon. Dan karo mayok baton ble ki’n ariv dan son dezyenm mwan, Edwar in tir son semiz i’n met en kote. Son kannson wasko ble in preske tou tranpe avek transpirasyon. Fodre i fini kas later ek sa nef dernyen fose avan i desann pour al dezennen. Apremidi avek soley tonbe, i pou al dan son zarden pour al tras taba.

Anzel pa fye kriy li. I’n tro fatige i kapab danzere. Edwar pa kontan ganny enteronpe dan son louvraz.

“Fodre mon annan plis lardyes. Mon a pik enn avan, apre mon a kriy li.” Anzel i desann e antre dan lakwizin. I plonz en lanmok ki pran en lit dan son pti bidon. En sel koupe lanmok i lanmwatye. I poz sa ki reste lo bife e i pran en sigaret silwet. I ris de bon lafimen e i bwar sa lot lanmwatye.

“Sa baka ozordi, wi, i’n arive. Aprezan mon a kapab diskite avek sa zonm. E ou Edwar ou pa vin manze ozordi?”

“Mon pe vini mon ser, mon a fini sa de pti fose avan.”

“Mon bezwen ou. Degaze desann.” Anzel i desann lo ros i antre lakwizin. I pran en lot lanmok e asiz lo peron avek son lanmok obor li. Edwar pa tarde. I traverse avek son semiz lo son zepol.

“Zot ou ankore pe antonn sa baka! Ou fatig mon latet. En fanm i kapab bwar depi bomaten ziska aswar?”

“La ki mon’n bwar, ou pisar? Pa aprezan ki mon pe gout en ptigin baka?”

“Si aprezan ki ou konmanse, be pa bwar ankore. Mon’n nepli kapab viv avek en fanm ki santi loder larak tou le zour.”

“Gete, pa fatig mon latet ou osi. Oli mon larzan?”

“Ki larzan?”

“Ou pa konnen ki larzan? Ou pa konn larzan?”

“Gete, donn mwan mon morso manze. Ou, ou manz baka pour viv. Mwan mon bezwen manze, mon annan ankore travay pour fer.”

Edwar i sey mont peron pour al tir son manze lakwizin, me Anzel i apir li deor an dizan, “Mon larzan mon demann ou oli?”

“Ki ariv ou? Ou baka i fer ou anvi lager avek mwan?”

“Wi, mon ti kit mon kaba dan komod e mon’n zwenn li deor, aköz?”

“Gete fanm, pa fer mwan fer tapaz. Mon pa konnen ki larzan ou pe dir. Lev devan sa laport les mwan al rod mon manze.”

“Si ou pa konnen lese. Mwan osi mon tanpi.”

Anzel i anval sa morso ki ti reste dan son lanmok, i ranpli en lot e al asiz lo ban anba langar. Edwar i antre lakwizin pour tir son manze. Arivan lakwizin kastrol ki i ti’n lave bomaten i ankore

kot i ti'n savire lo tabli parmi bann lasyet. I pa dir naryen. I met boulwar lo dife i fer en lanmok dite byen ole, e i manz en bon morso dipen e i al dan son zarden menm si soley i ankore en pe for. I pa pou reste la. I pa menm kapab get son fanm ankore. I'n konpran ki en keksoz in bezwen arive e si i reste kot lakaz i pou bezwen fer sa fanm keksoz. I'n war sa kaba ki zot ti abitye met larzan ouver dan lari devan peron. Sa kaba pa ti zanmen ariv devan laport si Anzel pa pe al lanmes sis er dan Dimans bomaten. Sa pa pour li. Menm si i pli sou. I touzour servi son larzan lapire pour fer son bann pti depans lasemenn. Me demen bonmaten avan ki Anzel a met son lipye deor i pou bezwen rann li en kont sa zafer larzan.

Baka zanberik pe al dan son dezyenm semenn. Avek sa formantasyon lekors bwa blan ki ti ladan, in fors tantin poz latet lanmenm lo ban e sonmey pe konmans zwe son rol. I pa pou kapab fer plis.

* * * * *

Edme in fatigue dan sa soley Ans Lanmous. I bezwen en lanmok ki byen sek pour revey son memwar apre en zournen travay dir.

Edme i travay avek Msye Remon. Apre ki i'n fini balye anndan e deor biro i al donn koudmen prepar plant ki pli tar pou al plante. Ankore dan trwa an i pou ganny son sekirite. Li i pa kapab fer louvraz ki bann zenn fanm i fer. Depi son mari in mor i pa anmerd li avek personn plis ki son lanmok kan i sorti travay. La anba sa langar, konmsi i ti'n lwe en ban tou le 4 er 30 apremidi ziska 6 er diswar, ler i mont kot li pour al kwi son manze, apre ki i'n

donnen e anmas ase nouvel pour lannmen dan travay kan zot pe prepar plant zot de Monik.

Monik i ankore zenn, i fek fini etidye Politeknik e prezan i pe aprofondi son konnesans dan lagrikiltir avan i al etidye a letranze.

“Bonzour, Msye, Madanm. Zot ou dormi? Ki sa ou malad?” Edme i dir bonzour kan i'n ariv anba langar.

“Bonzour mon ser. Ou konnen sonmey ti oule bag mwan.”

“Mon trouve me mon ti krwar ou malad.”

“Non mon pa malad. Mon'n pran en laraz avek sa nespes kalite zonm e mon'n tonm la pour repoz mon latet.”

“Zot mwan sanmenm ou war depi Floran in mor, mon pa anzard mwan avek personn, parske sa bann zonm konmela zot tro oule domin fanm.”

“Lekel mon ser? Ou pa i konn mwan. Kan mon'n met mon de, napa enn sa bann zonm konmela ki pou fer mwan per. Zot a zis fer tapaz koumsanmenm.

“Mon kapab pa konn ou! Kontrer oli mon zanmi?”

“Lekel mon ser?”

“Flosi. Mon'n war li vin kot biro bomaten e apre gard in pran li ek son zanmi e zot in desann kote isi.”

“Wi mon ser. Mon fek sorti fer sa bann gard ki napa kat bouton dan zot labraget konnen ki mwan. Zot in dir mwan ki zot pou kit li dan kaso pour pas ankore Ans Rwayal demen bomaten.”

“Mon ser alor zafer ti koumsa? Ekoute. Donn mwan en lanmok apre nou a koze.”

Kan Anzel i sorti lakwizin, olye enn i vin avek de pli gran lanmok ki mezir en lit.

“La ou la mon ser. Goute si pa mank naryen.”

Edme i pas ledwa dan son lalev i tir son sik taba e i kol avek poto langar kot ti annan plizyer bann mark lasik taba ki i ti'n mete tou le zour avan e letan i pe bwar. I annan ler ki i rebran sa menm vye lasik pour resike, sirtou kan son tabatyer pe al lo vid. Apre i pran son lanmok e fer desann de gran gorze. I poz larestan lo ban akote li e i dir, "Sa wi mon ser. Konmsi i pli bon ki yer swar."

"Ou a gete ou menm. Mon pa ankor fini rakont ou," Anzel i kontinyen, "Bomaten ler serzan i telefonn mwan, mon ti pe koze avek de zonm ki ti pe bwar la. Pa bezwen dir ou mwan osi mon ti'n tap de. Konman i dir mwan ki mon piti i dan kaso mon'n fini pa war kler. Nek mon'n pas sa rob lo mwan e mon'n desann kordgard. Mon'n bliye ferm laport e mon pa'n dir Edwar ki mon pe sorti pangar i ti a ouver son gran lagel."

"Ou annan rezon mon ser. Zonm touzour pe enterfer dan zafer fanm ki pa konsern zot."

"Ekoute, mon pa ankor fini. Mon ser ler mon retournen sa de zonm ki ti la zot in pran zot semen zot in ale. Mon war mon kaba vid dan lari. Mon get lakwizin, tou mon larzan, baka osi in disparet."

"Mon ser ki ou'n fer? Kekfwa ou bonnonm ki'n fer sa."

"Mon pa konnen me mon'n sey demann li konmsi i pa paret konn naryen e apre i pa pou fouy dan komod pour pran mon kaba. Mon pli asire ki sa de zennzan ki ti la ki'n kapab vol mon nef mil rounpi kek sou."

"Be ou'n al lapolis mon ser?"

"A sa bann gard boufon ki annan isi pa pou pran ka avek sa ki mon pou dir zot. Zot zis vey dimoun ki bwar dan semen e kote ki fer lapire pour zot ganny galon."

"Pa koze Anzel. Mon ti pe al dir sanmenm. Be ki ou pou fer pour ou bonnonm pa konn sa?"

"Zot mon pa konnen ki mon pou dir li. Eksa i paret byen araze depi yer swar ler Zanbatis in vin sers Flosi."

"Be sa napa naryen pour fer avek li. I'n fer son piti i pa'n fer pour li. Eksa zot annan zis de piti. Enn in marye e Flosi i la litousel i pou bezwen anmize non?"

"Mon ser pa nonm Edwar sa parol. Si sa piti i bwar de lanmok baka sa zonm a konmans mangonnen zanmen fini."

"Be ki i oule? I oule sa piti reste kapon parey li? Li kan i bwar en sopin labyer i sou e al dormi parey en boufon."

"Mon ser ou pa pou war lotreman avek piti ki'n grandi dan zip zot granmanman."

"Ou annan rezon. Sa bann gran fanm lontan pa ti oule depans larzan telman zot ti avar me mon mari pa ti koumsa. Li kantmenm dokter ti'n dir li aret bwar, otreman i pou mor i ti anvoy zot pronmnen. I ti dir mwan kantmenm i pou aret bwar i pou mor menm, bwar i pou mor menm, i'n pik son grog ziska son lanmor."

"Mon ser sa bann dokter konmela sanmenm ki zot konnen. Saler al get kot zot i ranpli avek bann boutey labwason for. Konmela tou sa ki mor zot dir bwar ki'n touy li. La li Edwar aswar sanmenm son gran parol kan mon pa ganny sonmey. Nek i la, "Sa bwar pou met ou dan ou sis plans si ou pa donn li lape. En dimoun pa kapab bwar tou le zour."

"Be ki i oule ou fer? I anvi ou al fer lavi?"

"Be mwan mon antren sa telsoz mwan? I koze ziska i fatigue e annandeler i leve e al dormi lo sofa dan salon sanse i'n nepli kapab respir loder bwar."

"Mon ser pa bliye ou annan en piti dan kaso."

"Zot wi. Ou konnen mon ti pe bliy Flosi. Saler demen i pe al pas ankour. Ki mon pou fer? Eksa mon napa en larzan."

"Mon ser pa trakas pour larzan. Mon a pret ou en de san rounpi. Ki ou ti pou fer avek?"

"Mon ti oule al fer en debrouy kot grannwanr dan leo."

"Egzakteman sanmenm ki mon ti pou dir ou. Pa tarde donn

mwan ankor en lanmok apre nou a monte menm. Be grannwanr pa pou rode kot ou pe ale?"

"Mon a dir li mon pe mont kot ou."

Anzel i antre lakwizin. Ler i sorti i vin avek en lot lanmok lapire i donn Edme. Apre i kriy Edwar ki ti pe okipe dan zarden."

"Edwar vin en kou mon gate."

"Vin la mon pa pou kapab sorti."

Anzel i fer letour lakaz i ariv kot Edwar pe tras plan taba.

"Mon pe sorti en moman. Zet en koudey kot lakaz."

"La ou pa ankor ganny ase, ou bezwen al rod pli o. Sa ki mon pa kontan avek ou. Ler ou'n konmanse, fodre ou sek pour arete. Akoz ou pa fou ou fes ater..?"

"Gete Edwar, mwan mon gran. Mon konnen ki mon pe fer. Pa ou ki pou montre mwan. Aret fatig mwan."

"Demerd ou. Fer sa ki ou anvi me aswar rod ou dimoun pour evant ou dan lannwit ler ou leker pe anvole. La ni en morso manze ou pa'n met lo ou lestoman. Zis ou pe antonn lapire."

"Ki manze? Zonm o aret fatig mwan ou."

Anzel i devire e zot pran larout dan leo zot de son serkordon. Konmsi son mari ti'n zour li. I napa letan pour ekout bann parol parey. Lot fwa osi i ti al war spesyalis konsernan maladi leker e dokter ti les li konpran ki son leker ek lefwa in konmans enfekte avek lalkol. Dokter ti dir li fodre i aret bwar pour lavi si i oule son lavi e ti donn li tretman pour de mwan apre en randevou kan son tretman i fini. Me Anzel ti anvoy dokter pronmnen avek son randevou ek son tretman. Kan i ti pran pti montanny avan ariv kot li, i ti balans sa de pti lanvlop pilil dan touf kannel e son menm swar i ti kontinyen bwar son baka. Depi sa tanzantan i tonm malad e parfwa i dir i war pwason anpandan dan lakaz. I tann bann lavwa koze dan lannwit ki anpes li dormi e i menm dir

plen fwa i'n war zako pe balanse dan pinyon lakaz. Pov Edwar, i'n fer tou leksperyans sa lavi anmer e parfwa trwa zour i pa dormi pour sey konsol son fanm kan Flosi pe ronfle lo son lili e parfwa i pa menm la.

"Mon ser mon a pas dan lakour pour pran ankor en pti larzan akoz nou pa konnen konbyen grannwanr pou pran nou."

"Bon lide Edme, mon a esper ou lanmenm lo sa pti ros. Konmsi mon fatig vitman ozordi."

Kot Anzel pe asize, i war byen kot lakour son premye fiy ek sa zoli zarden, bann fler tou kouler dan lari, osi sa zoli karo mayok ek patat ki Remon ti fek vann de tonn. Son lizye i tap anba pye mang sab lot kote lakaz. I remark byen sa zonm ek son fanm pe anbras kanmarad e apre zot fer en gran riye. Sa ki i ti war ti fors li fer en refleksyon lo son mantalite e i dir dan limenm, "Get sa de zans kimannyer zot byen avek kanmarad. Zot pa menm tandé si problem i egziste dan lavi maryaz. Zot annan zot gran lakour, zot de piti e zot viv byen trankil, tandiski mwan zanmen mon pa dan problem."

Letan i pe koz tousel son zanmi ti arive deryer li pe ekout li, me i fer krwar i pa'n tann son konversasyon.

"Mon ser mon pe vini menm. Konmsi ou'n fatige espere?"

"Non Edme. Mon lespri i lwen la mon ser. Mon pe get sa de zans kot pe fer kokot la anba."

"Lekel zans mon ser?"

"La kot Zozefin. Mon trouv zot pe anbrase zot de Remon e zot pe riye konmsi problem i en etranze pour zot."

"Me mon ser ou pe dormi avek pei. Ou oule dir mwan ou pa'n tann naryen ki pe pase lo laferm?"

"Mon ser mwan mon pa laba. Kot mon pou konnen?"

"Be annou mont touzour mon a pens ou keksoz."

Zot kontinyen monte, Edme pe kalkile kimannyer i pou detri sa lanmour ki egziste pour Remon dan leker son belmer.

“Zot nou pre pour nou ariv kot lakour. Ou pa ti pou rakont mwan keksoz?”

“Abe, ou konnen mon pe bliye.”

“Zot pa dir mwan lo Flosi ankor.”

“Non mon ser, pa zis lo Flosi ki annan lokipasyon. Zozefin osi pa dan byen. Ou oule dir mwan Flosi pa’n rakont ou? Enposib ki i pa konnen ki pe pase.”

“Be rakonte. Ki ou pe fer sa bann gran letour?”

“Mon pa pe fer letour. Pa tou keksoz ki bon koze, sirtou konmela ou pa konnen ki ler dimoun pe ekout ou parol.”

“La personn pa pe ekout nou.”

“Mon konnen. Annou debout en kou. Nou pre pour arive. Wi, mon ser ou pa’n tande ki Remon i annan en pti galan ki travay lo laferm? Flosi pa’n rakont ou?”

“Mon ser Flosi ler ou war li i’n tap son de ou pa pou ganny en parol dan son labous. I koz zis avek son galan e ler i azen i pa antre kot lakour boner.”

“Zot pa fer mwan ganny problemm avek mon bourzwa mon ser. Gard lalang pour manz diri. Ou konnen nou manman kan nou tann en keksoz lo nou piti nou leker i fermal.”

“Non mon ser. Ou pa i konnen mon pa en fanm palab?”

“Be mon ser Remon i galan avek Monik. Sanmenm i pe fer fason pour pous Flosi dan travay.”

“Pous Flosi? Ou oule dir mwan Flosi pou ganny pouse?”

“Mon pe koz ou parol mon ser. Ekoute zis pa met mwan dan kankan. Bomaten ler sa piti in vin travay zot in fer li retournen e zot ti telefonn gard pour fer aret son pti zonm dan semen. Apre ki Flosi ti’n fini ale, Remon ti telefonn biro direkter. Mon ti tann li pli tar pe dir avek Marsel ki direkter i demann li osi pour ekri

en rapor pour met avek son rekonmandasyon, me zot pa ti remarke si mon ti pe ekout zot par lafnet.”

“Ki sa Marsel ankor la?”

“Ou pa konn Marsel piti Klaris ki reste Ans Soley?”

“Anr, mon konn li sa pti telsoz. Be li ki i pe rode avek Flosi?”

“Mon pa konnen mon ser. Me enn de zour mon’n remarke ki i pa tro manz disel avek mwan osi.”

“Zot ou a dir mwan vre Remon a fer sa avek Flosi pour naryen san ariv en lot keksoz, degre sa de zans ti byen avek kanmarad? Flosi menm in fatigue dir mwan, si zot perdi Remon la Ans Lanmous zot pour soufer, e mannyer sa zonm i tou pour son lakour?”

“Mon ser pa met ledwa dan dife, zonm sa. Zot parey lisyen. Napa pourtir ki zot pa met zot labous ladan. Devan ou zot zwe senser. Ler ou vir ledwa napa ki zot pa fer.”

“Anfen mon ser parey ou’n dir, mon pa pou dir zanmen, mon pa’n trouve.”

Edme i remarke ki Anzel in fini aval son labwet pouri. I dir,

“Anfen mon ser pa ganny sok, annou monte taler fernwar a fer.”

Zot ti’n ariv pre avek lakaz kot zot ti abitye vini tanzantan, sa gran lakaz an blok trwa lasanm lo latet montanny. Kan ou dan lari ou kapab dekouver ase byen obor lanmer Belazar e Ans Lanmous osi. La kot zot pe debout anba pye zavoka zot kapab eksplwat sa bon ler divan ki sorti obor lanmer. Dan pye, zavoka pe donn lenvitasyon nenport labous, a leksepsyon bann ki prefer li kan i’n rape e melanz avek disik, tel ki sa de madanm ki pe debout anba pye.

“Bonswar, bonswar Msye, Madanm, Manmzel,” Edme i dir. Me personn pa reponn. Video pe fer tro tapaz. Bann dimoun pe

konsantre dan film. Zot napa letan avek sa ki pas deor. Apre sa zournen byen fatigan zot pe detann zot en pe avan get program televizyon.

“Zot dormi?” Edme i demann pour dezyenm fwa.

“Vole. Mon trouv zot. Mon pe gete ki zot pou fer,” en lavwa swasannkenz an i reponn dan karo manyok.

“Zot Ton Bib koumsa ou ti pe get nou?” Anzel i demande.

“Be wi. Ki sa divan ki’n anvoy zot isi tar koumsa?”

“Pa demande mon vye galan. Ou’n bezwen konnen ki zafer pa mars byen dan leba,” Anzel i reponn.

“Mon pa’n tann naryen mwan mon ser. Ou pa konnen mon desann anba laba zis pour al pran mon pti larzan lafen dimwan, apre sa fodre mon malad.”

“Monte degaze, fernwar pe fer e la nou’n fini swaf,” konversasyon ant Anzel ek Bib i kontinyen.

“Be sa ler napa kafe la.”

“Ki kafe ou pe koze? Granfanm pa servi kafe, mon pe koz sa ki dan banbou.”

“La prezan ki ou pe fer ou kreol kler. Antre touzour mon a gete si i ankor reste.”

“Annou antre Anzel. Pa perdi letan.”

Zot antre dan en lasanm labitid kot i ranpli avek tou sort gonaz, bann bout dibwa tou kalite, vye larap mayok, en krisifi kase, en vye laglas, tou kalite poban dan tou sort dimansyon ki ranpli avek delo ek lapay, en vye lalanp delwil koko ek en latab dan milye ek kat sez. Lo sa latab i annan en pake kart, en laglas. Dan en poban konfitir vid ki’n ranpli avek later, i annan de trwa pti dibwa nwar ki pe sorti lafimen e san dout, i annan bann zimaz Bondye ek plizyer bann Sen renonmen ki ti’n alinyen lo miray dan kat kote sa pti lasanm.

“Zot sanse. I reste zis de boutey kat,” Bib i dir par laport ki vir

avek lakwizin.

“Anvoy tou le de,” Edme i reponn. Bib i donn zot sa de gro boutey kalou e i asiz lo sez ki obor latab e demann zot, “Zot in sorti anba laba zis pour vin rod kalou sa distans?”

“Non Ton Bib,” Anzel i reponn, “Nou pa’n vin rod sa, nou vin fer en pti debrouy. Zafer pa mars byen dan leba,” Anzel i reponn.

“Ar... Ou pa i konnen kan nou vin isi i bezwen annan keksoz ki pe arive?” Edme i azoute.

“Ekoute mon a rod de ver pour zot.”

“Ki ver? Nou zanfann lakour nou a bag li an goulo,” Anzel i dir.

“Be bon sa zot zafer si zot pa oule.” Letan Bib pe dir sa son laglas avek detrwa pti larzan kwiv lo la, ti dan son lanmen.

“Grannwanr si mon rakont ou ki ka mon ladan, zanmen ou pou krwar.” Bib ki’n tann tou sa ki zot ti pe rakonte dan semen kan zot ti pe debout dan karo mayok, san ki zot apersevwar li kot i ti’n madre avek en pti pye bannann gabou i dir, “Pa bezwen rakont mwan, les mwan gete, mon konn mon louvraz mwan. Mon’n fatigue dir zot kan zot vin fer en travay kot mwan, pa rakont mwan naryen lo sa size.”

“Be ale fer ou zafer.”

Bib i frot frot sa bann pti sou lo sa laglas e i balans son latet. I met sa laglas lo latab e i dir avek Anzel, “Mon ser ki sa zafer lapolis ki annan kot ou?”

“Mon piti, Ton Bib, i fek ganny arete bomaten.”

“Be wi, i fek gannyen, mon trouve e i byen serye.” Bib i frot ankor de trwa fwa e i dir en nespes langaz, apre i dir avek Anzel, “Mon ser mon pa dir ou al fer diskisyon, me sa zafer pa pir ditou. Kot ou fiy i travay i annan en lot pti fanm ki pe met pik avek sa ki ansarz zot pour pous li dan travay. Fodre ou fer byen atansyon.”

“Ton Bib, la oumenm ki konnen ki ou pou fer.”

“Wi mon konnen.” Bib i get ankor dan laglas.

“Be pa zis sa enn ki dan problem, sa enn ki’n marye osi pe ganny kontrayete dan son menaz.”

“Ki mon ti dir ou mon ser? La i dir ou.” Edme i dir Anzel, “Zot mon pa konnen ki mon pou dir zot, gete ou menm Ton Bib, mon lavi i dan ou lanmen.”

“Mon pa pe koz lalang, mon pe dir ou sa ki mon trouve. Si pou lalang, sa laglas ki lalang,” Bib i kontinyen, “Mari ou fiy i annan en lot fanm kot i travay e sa fanm pe fors li pour kite avek son madanm marye.”

“Lala! Ki mon ti pe dir,” Edme i dir.

“Zot vre mon ser, ou pa manti. Ton Bib ou osi pa zouzou en! Ou konn fer ou louvraz,” Anzel i dir.

“Byensir mon bezwen get byen. Akoz mon pa kapab anbet en dimoun e pran son larzan pour naryen.” Bib i kontinyen.

“Be sa ou fiy ki’n marye la, li osi i konnen ki pe pase me i pa kapab fer naryen akoz son mari in anmar li. I pou zis aksepte tou sa ki arive.” Anzel pa dir en mo, zis i get Bib. Me Edme pa pou reste trankil. I bezwen dir en mo pour aprouv son rimer, Bib pe donn sa ki i anvi tande.

“Sa ki kalite zonm sa? I pran piti dimoun pour fer pas mizer. Sa pov fanm saler pe tonbe leve pour son lakour parey en dondosya vivan, kan li i pe trennen avek tou kalite femel lisyen dan tou lapay.”

“Pour mwan kapab sonny li, fodre i kite reste kot son mari e ou a met li kot ou. Anzel ki ou dir?”

“Bwar ou boutey kalou mon ser pa etonnen,” Edme i dir e i met son boutey degoute i fer en dezyenm koupe. Ler i met sa boutey ater i reste forse en boutey edmi ladan.

“Be bon Ton Bib, get Flosi avan. Mon a fini avek enn apre nou a pran lot.”

“Ou fou, kontrer travay tou le de anmenmtan.”

“Non edme, Anzel i annan rezon, nou pa pou kapab tay avek de poul anmenmtan. Fodre nou pran enn alafwa, sansan nou pa pou ganny ni enn.”

“Koz tou Bib. Ou zonm. Pa parey sa bann voler larzan.” Bib i pran son laglas i fer ankor son bann grimas epi i dir Anzel, “Sa zafer pa en pti zafer sa. Fodre nou byen atak li. Ou pou bezwen depans en bon larzan avek.”

“Pa trakase ou, okip mwan. Si mon pa kapab pey ou tou, mon a donn ou pli tar.”

“O.K. mon ser, mon konnen ou pa pou vol mwan me mon pe dir ou. Prezan ekout mwan byen sa ki mon pou dir ou. Ou pou bezwen al fer en travay byen enportan.”

“Zot kisisa ankor?”

“Be les li dir ou Anzel.” Bib i kontinyen, “Ou konn non sa ziz ki pou ziz zafer ou fiy?”

“Be wi Ton Bib.”

“Bon, ekri son non lo en bout papye e anmar sa papye avek en pe difil nwar, apre met anba ou peron lakaz kot ou pas pli souvan.”

Bib i donn Anzel en pe lapousyèr dan en morso papye e i dir, “Sa fodre ou al senm ou menm kot lakour Ans Rwayal demen bomaten. Fodre ou la byen granmaten avan ziz i arive e fodre ou senm sa kot i pou pase pour li sote. Apre senm en pe partou partou e mwan mon a travay zot isi.”

“Ki mon ti dir ou Anzel? Ou ti pe fatig ou latet kan Ton Bib i kapab tap sa de kou de kou,” Edme i dir.

“Mon konnen me mon bezwen enkyet, kantmenm ti a ou, ou lespri pa ti pou an pe.” Anzel i kontinyen, “Wi Ton Bib, be sa lot msye la, ki nou pou fer avek li?”

“Mon’n dir ou fodre ki ou fiy i kite reste kot li pour mwan

kapab fer keksoz.”

“Be O.K. mon konnen ki mon pou fer.”

“Pa dir ou al grat leren avek li. Ou konn ou ler ou’n war ou zann, konmsi ou’n trouv en Sennyer.”

“Zot Edme, pa pran mwan pour en dimoun pa konpran. Mon ti bezwen kontan li akoz mon pa ti konnen si i pe fer tou sa pake lavi.”

“Koumsa zot ete sa bann zonm konmela. Si ou pa fer en pti marse tanzantan, ou pa pou konnen ki zot pe fer anba anba.”

“Koz tou Ton Bib,” Edme i azoute.

“Zot! fernwar pe fer, Ton Bib konbyen i arive?”

“Mon ser mon pa pou fer ou pey ser, akoz i annan ankor travay pour nou fer. Pour sa enn, ou a donn mwan desan senkant rounpi.

“O.K. Ton Bib. Ou zonm. Edme pey li mon ser.”

Edme i ouver son vye pers e i donn Bib desan senkant rounpi. Zot fini bwar zot kalou e zot desann sakenn kot zot lakour. Arivan kot li Anzel i diriz ver son komod avek en keksoz dan son lanmen. I ouver tirwar, i tir son kaba ki pli boner ti dan lari e i met sa ki dan son lanmen ladan. I pran son kaye ki i mark son kont lapire ladan e i ekrir non sa ziz ki pou ziz Flosi lannmen bonmaten. I pran en pe difil nwar i garot sa fey papye, i desann peron e met sa papye anba en ros. I dir tousel, “La mon met ou la Friso. Ou a tande i annan Flosi demen.”

“Anzel ki sa bann ensinifyan ki ou pe fer? Zanmen ou pa sou kot sa lakaz.”

“Edwar o, bous ou avek mwan, mwan mon konnen ki mon pe fer. Ou reste trankil.”

“Reste trankil? Swadizan tou le Dimans ou pe pran lakonminyon kan ou pe fini ou letan kot bonnonm dibwa.”

“Sa pa ou zafer, e mon pe dir ou demen kan mon sorti ekout zafer Flosi mon pou al sers mon piti kot Remon.”

“La ki ou pe dir? Ou pa onte?”

“E ou, pa fer mwan, E ou...”

Edwar pa antren Anzel plis ki sa. I konnen ki si i kontinyen zafer pou vin pli gro e Anzel pa pou aret koze.

Lannmen granmaten Anzel i prepar li e i desann Ans Rwayal avan ki tou dimoun i ariv kot lakour. La kot kordgard i pou fer son bann ensinifyan ki Bib ti dir li. Ler lakour i ouver, Anzel i la. En madanm pe balye lasal. Zis kan i sorti Anzel i antre e i konmans senm son lapousyer, apre i asiz lanmenm dan ban. Bann dimoun ki ti osi pe vin zize ti osi arive en pe pli tar. Apre en bon moman de gard i antre avek Flosi ek Zanbatis. Zot asiz dan menm ban avek Anzel, me en gard i asiz ant Zanbatis ek Anzel. En kou an gran en lavwa i dir byen for, “Kort” e tou dimoun i debout. En zonm blan i antre par laport devan akote boks.

Sa zonm ki lizye dimoun ki abitye fer zafer lapolis i konn byen e menm Anzel i’n war li plizyer fwa kan in vin zize pour lapire, kankan e dezord an piblik. Ozordi li Anzel i napa zafer, me i’n vin lo en misyon spesyal. Sa zonm i asiz devan tou lezot dimoun lo en sez ki obor en gran latib. Apre lezot i osi asize. Apre ki ziz in get vit bann papye ki ti lo son latib i koz dousman avek en gard san ki personni i tande e sa gard i kriy “Flosi Sere” ek “Zanbatis Frankour.” Avan al devan, Flosi i get son manman avek en regar lapenn e Anzel i fer en pti sourir pour donn li kouraz. Arivan devan, gard i fer zot debout obor boks dan kote drwat ziz e ziz i lir zot sarz konmansan par Zanbatis.

“Msye Zanbatis Frankour, ou’n ganny akize dray negligans lo larout piblik e anmenn en masin anba lenfliyans lalkol? Ou

koupab ou pa koupab?”

“Mon koupab votoner.” Ziz i kontinyen, “Manmzel Flosi Sere, ou’n ganny akize pour lager avek en zofisye lapolis kan i ti pe fer son travay. Ou koupab ou pa koupab?”

“Mon koupab votoner.”

Aprè sak repons ki sa de akize i reponn, ziz i ekrir lo son papye.

“Zot annan keksoz ki zot ti a kontan dir avek lakour?” Ziz i demann zot. Tou le de pa anvi dir naryen, alor ziz i koz dousman avek prosekiter aprè i kontinyen. Letan i ti pe ekrir i ti’n fer sa de akize asize.

“Zot kapab debout prezan. Msye Zanbatis Frankour, lakour i war ou koupab me, akòz i premye fwa ki ou fer zafer nou’n pran en pe konsiderasyon pour ou. Ou ganny kondannen de semenn prizon e de an ou pa pou ganny laysens. Manmzel Flosi Sere, ou osi lakour in war ou koupab e ou osi i premye fwa ki ou fer en zafer lapolis, mon kondann ou de san rounpi avek de an kosyon.” Kot Anzel i asize dan ban, konmsi en dimoun in tir en pwa de tonn lo son latet. I get anler e i ris en gran lespirasyon. Dan son lespri i dir, “Bib pa’n dormi lo mon zafer, sa zonm net.”

Gard i pran Zanbatis e zot pas par laport kot ziz ti antre e Flosi ek son manman i sorti par laport kot zot ti antre. Flosi i sey al demann en konstab dan kordgard si i kapab dir en dernyen mo son lanmoure.

Zanbatis pe asize lo en sez dan kordgard pe esper transpor pour al prizon.

“Bonzour konstab, mon kapab koz en moman avek Zanbatis?”

“Non fiy, ou pa pou kapab e mon pa ganny drwa les ou.”

“Konstab fer sa pour Bondye, zis pour dir li orevwar avan i kit mwan.”

“Ki ou ete pour li?”

“Mwan son lanmoure.”

“Mon pa ganny drwa les en sivilyen koz avek en kondannen.” Larm Flosi i koul volonter e mouy son figir. Non i pa pou kapab les Zanbatis al koumsa. I bezwen koz avek li en dernyen fwa. Larm sa zenn fiy i kas leker konstab e Flosi i persiste, “Konstab, zis de segonn.”

“O.K. depese avan serzan i vini, zis de segonn.”

“Flosi pa ganny letan dir mersi, nek i sot lo Zanbatis e zot may kanmarad. Zot konmans anbras partou lo latet, dan figir e menm lo ledò. Sa konstab i bezwen demay zot avek kanmarad aprè trwa minit.”

“Ase lis kanmarad la. Taler serzan a vin war zot e mon a ganny zafer dan zot plas.”

An fiks an dan lizye kanmarad, zot dekouste dousman dousman ziska ki Flosi i ariv devan laport e zet son lekor dan lebra son manman an pleran.

“Pa plere mon piti, de semenn i pas vit, taler i a sorti. Annou monte. Ase fer ou lenbesil.”

Zot pran larout pour esper bis obor semen. Zis konman zot ariv dan semen bis i arete e zot anbarke.

Zot asiz en pe deryer obor kanmarad. Flosi i ankòr pe plere, son lizye pe konmans vin rouz. Kot zot in asize napa person ki pou tann zot konversasyon. Anzel i profite pour pran en pe lanket lo sa ki ti arive lavey avek sa de zenn anmoure.

“Ase plere prezan mon piti, taler tou dimoun a konn ou zaksyon. Prezan rakont mwan ki’n arive avek zot e ki pe pase kot ou travay?”

“Mon mazin Zanbatis Manman.”

“Zanbatis les li prezan. Mon pe demann ou kot ou travay Ans Lanmous. Dir mwan ki’n arive ant zot de Remon?”

“Remon pa’n fer mwan naryen li, Marsel ki’n fer son gran

dominer avek mwan.”

“Wi, me Remon pa’n dir ou naryen ler ou ti al travay yer bomaten?”

“I ti pe koz avek mwan, apre Marsel in vin dir li en pake lalang ki’n fer li dir mwan al kot mwan ziska nouvo lord.”

“En, pa dir mwan i pa’n fer ou naryen. Remon pa i avek sa pti syenn ki travay dan nersri?”

“Lekel? Monik?”

“Mon krwar limenm sa Monik la.”

“Mon pa konnen mwan. Zanmen mon’n war zot pe koz lot keksoz ki travay e mwan mon pa krwar ki Remon pou fer en keksoz parey.”

“E ou piti ase fer ou lenbesil don. Ki sa? Ou pe dir mwan en gran fanm konman Edme i a vin rakont mwan en keksoz lalang e menm mon’n al gete kot Bib yer swar, li osi i’n trouv menm keksoz?”

“Manman ou touzour avek ou bann lide siperstisyon.”

“Ki siperstisyon? Si pa ti Bib, ou ti a’n kondannen ou osi. Okontrer dir granmersi mon pa dormi avek pei. Mon konnen ou pa pou depler ou bofrer. Ou pou kasyet son pese aköz i soutir ou. Menm si i pe fer ou ser manz margož anmer ou pou les li.”

“Manman mon pa soutir li, me mon pa kapab akiz li pour en keksoz ki mon pa’n war li fer.”

“Be ale ou, ou a gete si ou a war travay ankor.”

“Anfen mon pa pou blanm li si i fer mwan kit travay aköz si mon’n fer mon fot mon bezwen ganny pini.”

“Ankor ou! Me pa krwar si ou kit travay ou pou vin antonn mon baka tou lazournen. Okontrer i demann mwan enn la kan mon pe mazin li.”

“Wi, selman ou pe pas mwan pour pli gran soular.”

“Mon pa pe dir ou ou en soular mwan, me ou pa kras lo la osi

ou.”

“Be wi en zako i touzour war lake son kanmarad pli long ki sa ki pour li.”

“Ki sa? Ou pe dir mwan zako?”

“Mon pa’n dir ou en zako Manman, mon pe dir proverb ki dir.”

Arivan kot kordgard Belazar, bis i arete e zot debarke. Serzan ek sa lot konstab ti’n osi arive depi en pe letan. Zot ti pe asize lo ban anba lavarang kordgard pe koze antre zot. Laboutik i ouver. Anzel pa ankor bwar dite depi bomaten. Dan son servyet latet i annan senkant roudi ki i ti’n fek vann baka granmaten kan bann travayer ti vin kas latet avan al rann lapel kot zot travay. Me li Anzel i pa’n tous naryen pangar i a kapab derobe kan i pe trafike kot kordgard Ans Rwayal. La son ler in arive, i pa pou esper ankor plis ki sa, i pe konmans tranble. Son latet i vid. I santi li fay. I bezwen fer keksoz.

“Flosi al rod en sopin gines pour mwan laboutik.”

“Mon napa larzan Manman.”

“Mon a donn ou mon piti, degaze. Ou a zwenn mwan dan touf bannann.”

Anzel i larg son gran servyet e i delarg sa nen ki dan bout e i tir senkant roudi i donn Flosi. Li i al touzour dan touf bannann. Flosi pa tarde. I arive avek de sopin dan son lanmen.

“La ou la manman.”

“Be mon ti dir ou enn. Kimannyer ou anmenn de?”

“Enn pour mwan Manman. Mwan osi, mon pa byen la.”

“Ou pou rann mwan mon larzan.”

“Napa problemm mon ker.”

Flosi i debous sa de sopin avek son ledan e i prezant Anzel

pour li. Zot asiz lo en vye pye bannann tonbe pour fer zot gines desann pli byen. Flosi i frot son lagel sopin avan, apre i kabannen. En sel kabannen ler i drese i'n deza anval lanmwayte.

"Sanmenm, anval pour ou an gran konmsi ou annan en kantite larzan."

"Mon pa kapab bwar konmsi mon dan lotel Manman. Taler gard a vini e nou a ganny ankor en lot zafer."

"Ki gard? Gard ki'n aste sa bwar?"

"Ale ou, fer lanmour sa ki pour ou."

Flosi i fer en lot kabannen e son sopin i sek vid. Anzel i ankor pe lit avek sa ki pour li. I'n bwar zis lanmwayte.

"Donn ankor en larzan mon a rod ankor de."

"E ou piti o, ou oule fini mon pti larzan, deza voler fek vol tou sa ki mon ti annan dan lakour?"

"Mon a rann ou dan lakour mon dir ou."

"O.K. Lala, fer sa ki ou anvi, mon donn ou tou."

Flosi pa tarde i al rod ankor kat sopin gines i anmennen.

"La, de pour ou, de pour mwan, apre nou a monte."

"Flosi, sa gines avek sa soley for pa pou fer nou latet fermal sa?"

"Les li, mon latet i deza fermal. La i demann mwan zis bwar e fer en bon sonmey."

"Mwan mon pa pou dormi tan ki mon pa al sers mon piti kot Remon ozordi."

"Ki piti manman?"

"Ki piti? Taler ou a trouve. Mon pa pou les Remon fer mon piti boufon kan i pe trennen avek tou kalite fanm."

"Manman ase krwar sa ki dimoun i dir ou. Kantmenm Remon i annan son defo mon pa krwar si i fer tou sa ki ou pe dir."

"Ou pa mel dan mon zafer, mon piti pour mwan, mwan ki'n

soufer pour met li lo later. Ou pa konn douler manman ou."

"Wi mon pa konnen me mon konnen ki Remon i en zonm senser."

"Zonm senser ou ki krwar, me Bib osi pa koz sa ki manti e si Bib i manti, Edme pa manti parski i'n war dan son prop lizye."

"Edme, lot gran pokrit. Napa nouvel dimoun ki i pa konnen. La pa lot ki i'n anvi fer sa de zans kite avek kanmarad."

"Flosi ase bet ou, en vye fanm konman Edme i a anmas en lalang parey lo son bourzwa pour naryen?"

"Manman ekskiz mwan aköz ou osi ou vye, me sa bann vye fanm parfwa zot menm ki pli lalang zot."

"Be wi kasyet li menm ou, ler i a ariv lo ou ki ou a konnen."

"Manman ant mwan ek Remon pa pou ariv naryen, mon pa pe pran son zentere me sa ki mon konnen se ki Remon en zonm ki tou pour son fanm, son zanf an ek son lakour."

"Be wi mwan osi mon ti krwar kan mon pa ti ankor konnen."

"Ou oule dir ki sa ki sa de zans in dir ou i plis ki laverite?"

"Sertennman, Bib pa'n anbet mwan, parski tou sa ki Edme ti pe rakont mwan an montan kan nou ti pe al fer sa pti marse pour ou, kan nou ti ariv kot Bib i ti repet menm keksoz."

"Anfen, mon pa pou kapab dir ou plis ki sa. Me kantmenm mon pa konn tro, mon konnen ki enterfer dan menaz en fanmiy i move."

"Zot degaze annou fini sa de sopin ki reste pour nou monte. Mon bezwen al tap kot Zozefin."

San pran plis letan zot anval sakenn zot dernyen sopin. Zot tap zot lenz deryer pour fer sir ki napa fey bannann sek ki'n reste kole deryer zot rob. Zot sot dan semen pour mont kot zot lakour. Ler zot pas kot kordgard, move manni Anzel i konmanse. I pa pou kapab mont trankil. I bezwen fer dimoun konnen ki li Anzel i pa pou dormi avek pei tan ki Bib pa ankor mor. I bezwen fer serzan

konnen ki li Anzel ek Flosi ki pe pase, i bezwen zet sa avek zot. I kriy byen for pour fer sir ki dan kordgard ek bann lakaz dan zalantour i tande.

“Mwan Madanm Edwar Sere mon pe monte avek mon piti Flosi. Zour Bib i a ferm lizye ki zot a met nou dan prizon.”

“J’ai reçu, J’ai reçu,” Flosi i azoute e may son manman e zot fer en pti ladans.

Dan kordgard personn pa antren si i annan de boufon lo semen ki pe zape e monk zot prop lekor. Ler zot remarke ki personn pa pe antren zot, zot larg kanmarad e kontiny zot larout.

Zot ariv kot lakour de er apremidi konmsi zot byen fatige. Anba langar bann dimoun pe esper Anzel avek pasyans pour ganny zot materyo labitid. Li Edwar i pa tann sa, i pa oule enterfer dan sa ki pa konsern li. I’n fini kwi manze e i’n manze. Sa ki pour Anzel ek Flosi i dan kastrol lo tabli lakwizin. I’n pous laport e i pe grat en ponnyen zig koko pour fer en balye letan i pe koz koze anba langar avek sa kat zonm ek de fanm ki pe esper son fanm arive. Konman sa de dimoun in arive zot in antre anndan. Apre de trwa minit zot sot deor e antre direk dan lakwizin. Zot pa’n koz avek personn e li Edwar i pa pou dir zot okenn mo li osi tan ki zot pa koz avek li. Flosi i sorti lakwizin avek en lanmok dan son lanmen. I asiz lo ban obor son papa anba langar.

“Manmzel donn nou en lanmok baka, lontan nou pe esper zot arive,” enn parmi sa kat zonm i dir.

“Mon frer sa foudre ou war granfanm menm sa.”

“Anfen msye annou leve.”

Sa kat zonm i leve e avans kot laport lakwizin. Sa de fanm i

reste asize lanmenm lo ban. Flosi pa pe gete si zot pe get li kot i pe tap son lanmok baka.

“Mon ser ou osi ou bag li ase byen parey nou menm?” enn parmi sa de fanm i dir.

“Be wi mon ser, ki mon pou fer ankor? Eksa la mon latet i fatigue. I demann mwan zis tonbe dormi la. Ki ou dir Papa?”

“Be wi, ler ou a leve ou traka i a’n fannen, pa i vre?”

“Non Papa, pa sa rezon, me selman mon a’n dormi en pe.”

“Si ou al dormi la, ou pa pou ganny sonmey.”

“Mon pou gannyen me pa avan en pake vir vire.”

“Zot! Pa zis ou mon ser, mwan osi si mon pa’n ganny enn, mon pa pou ganny sonmey kan n’ariv aswar,” Sa lot fanm i dir e Edwar i kestyonn li, “Ki sa ki anpes ou dormi?”

“Msye Edwar mon war tou sort keksoz e par ler konmsi mon tann dimoun koz avek mwan. Mon ganny pik pike en pe partou lo mon lekor.”

“Me akoz mon pa ganny tousala mwan?” Edwar i demande, “Ar be ou, ou pa bwar parey nou papa.”

“Akoz mon pa bwar parey zot? Mon pa i bwar avek labous mwan osi?”

“Non msye, i oule dir ou ou pa servi kantite parey nou.”

“Akfer en dimoun i bezwen bwar en kantite ki i pa kapab siporte, apre pour li fer en pake keksoz ki pa merite?”

“Zot les Papa trankil. Zanmen i pa pe fer bann gran gran kontour konmsi en avoka.”

Sa kat zonm i arive avek en pti seo ki zot in met tou zot baka ladan. Enn parmi i anmenn sis lanmok dan son lanmen.

“La nou la bannla,” Ogis i dir. Ogis i en zennonm avek tre malbar ki reste Be Lazar. I’n konmans bwar depi laz sez an. Li zanmen i mank lapel kot Madanm Edwar ek son fanm Terez ki li osi i en

malbares. Zot sel zanfani ne andikape e i ti mor apre de semenn. Dapre dokter Terez ti'n konsonm tro bokou lalkol dan son letan lansentman. Depi sa zot pa ti deside fer ankore zanfani, petet pli tar kan zot a'n pli vye. Ozordi zot in vin en pe pli boner akòz trwa frer ek en ser Terez in vin rann zot en pti vizit. Zot annan tou zot letan pou bwar ziska zot fatigue. Tanto zot pou reste kot zot ser, zot pa pou retourn Takamaka.

Toultan zot bofrer ti nonm zot sa baka kot Madanm Edwar. Ozordi zot in mont pour li, sepa si Madanm Edwar pou kapab satisfere zot demann. Zot oule konnen si vre Anzel i fer en baka enn pa ase e de tro bokou.

"Vide Ogis, ki ou pe tik tike?" Fransis i demande.
Fransis i enn ant sa trwa frer Terez.

"Mon pa pe tike, mon pe get sa bon kouler baka. Sa pa parey bann baka Katborn. Dapre mwan i pa pou zwe avek nou sa?"

"Zot ase fer ou lenbesil don, pas mwan sa seo mon a gete si i a fer mwan per," Devid i dir. Li osi i frer Terez.

An dizan sa i is seo ki ti devan Fransis e i ranpli tou le sis lanmok.

"La zot la, sezi disan apre zot a kontinyen koze."

"Felisya pa fer sa lanmok lanmour, mous a tonm ladan taler."

"Non Devid mon pa kapab fer parey en dimoun ki zanmen in trouv bwar."

"Mwan mon a gete sa ki pou anpes mwan bwar mon bwar." Kan Ogis i fini dir sa i met son lanmok obor son labous i kabannen. Ler i drese lanmok in vid.

"Ogis mon fatigue dir ou ase bwar an vantar."

"I pa vantar Terez, i kapab bwar."

"Sanmenm ou Devid, ponp li menm ou. Kan Ogis i bwar an

voras koumsa apre i pa kapab manze e i ravaze tou lannwit."

"A sa pa bwar ki fer sa, petet i pa ganny sonmey menm," Devid i dir. Dan lakwizin granfanm pe koz li tousel.

"Zot, mon bezwen al kot Zozefin pour al get son leta. Si mon pa ale ozordi mon laraz pa pou pase. Mon a fer sa Remon konnen kisisa lafanmiy Sere. En lot fwa kan i a tann nonm bann Sere i a ganny maloker. Non mon pa pou kapab ale ozordi pour kit tou sa kliyan la e deplis taler i annan ankore ki pou vini. Si mon les Flosi vann i pou koken mon larzan e Edwar pa pou antren li. Wi li Msye Edwar i blan, i pa met son lanmen dan lapire.

"Manman ou pe koz tousel?"

"Non mon piti, ou manman pe fer rezon."

"La ki rezon ou pe fer?"

"Mon pe mazin ou ser dan sa fore konmsi dondosya."

"Manman ase sa bann zafer, Zozefin i byen avek son mari."

"Flosi pa fer mwan dir ou en parol mal plase. Les mwan fer mon zafer. Ase enterfer dan sa ki pa konsern ou."

"Manman mon pa pe enterfer dan zafer etranze. Parey ou santi mwan osi mon pe santi parey. Mon pa ti a kontan si en dimoun ti a envant en tel rimer lo mwan."

"Rimer, rimer ki sa ki ou dir rimer ou? Ou pe sey prouve ki sa de gran dimoun zot manti?"

Flosi pa antren son manman plis ki sa. I antre lakwizin, i ranpli en lot lanmok baka e i sorti deor i al asiz anba langar kot i ti ete. Bann dimoun i kontinyen aste baka e plizyer lezot i arive ankore. Edwar i leve anba langar, i met son bann zig laba. I pa pou kapab kontinyen travay kot dimoun pe bwar, akòz i pa kapab adapte avek zot konportman. Zot konversasyon napa konmansman e napa finisyon. Plito i al dan son zarden, laba i an pe. Personn pa pou vin fatigue son latet eksepte bann madanm ki a vin aste enn de pti legim pour zot repa tanto.

An montan Danm Lerwa en fanm aze pe monte tou vites. I pe fer son mye pour sa pti lapli pa zwenn li dan semen avan i ariv kot Anzel. Depi bomaten i pa ankor ganny enn pour aranz lekor. Ler i ti pase Anzel ti'n fini desann. I pa'n oze apros Edwar pour demann aste en lanmok parske zot pa tro manz disel. I'n bezwen al travay kantmenm i tranble. Granmersi Remon i en zonm konpran. Kantmenm i'n war li pe kasyet kasyet i pa'n antren li. Sa kat boutey kalou kot Bib yer swar ti'n byen rabat li. I ti dormi san manze e menm bomaten i pa'n kapab prepar son dezennen aköz i ti lev tro tar. La i'n bezwen demann Remon pour li aret travay avan kat er. I'n fer li krwar ki i ganny en pe lafyev e san problem son bourzwa in les li mont kot li. An montan i pe mazine si son zanmi in arive, si i'n al sers Zozefin, si Flosi in osi monte e konbyen i'n kondannen. I osi mazine ki si Anzel i al repet avek Zozefin ki li ki'n rakont li sa swadizan konmeraz Remon, ki pou arive avek li dan son travay. "Non, i pa pou kapab dir sa parske Bib osi in dir li menm zafer. "Me selman kantmenm mon'n dir sa mon pa krwar ki Remon a fer en keksoz parey. En ler mon oule krwar i vre ki zot fer zot keksoz dan maske parske Bib pa ti a war dan son laglas."

Letan i ti pe dir sa litousel an montan, son lanz gardyen i repros son konsyans. Dousman dan son lespri en lavwa i dir li, "Edme ou'n fer en krim. Aköz ou pa konfes ou pese avan i tro tar?"

"Non pa mwan ki annan tor, Bib."

"Edme Bib ti tann ou kan ou ti pe rakont sa Anzel."

"Bib pa ti la kan mon ti pe rakont sa Anzel."

"Edme mazine ki ou bourzwa i bon avek zot dan travay e deplis i tou pour son lakour."

"Selman sa i vre," Edme ti reponn konmsi i ti war sa dimoun ki pe koz avek li.

"Non, mon pe fol? Remon i ganny peye pour fer sa travay byen. I fer sanblan bon pour nou kasyet son defo. Fodre mon fer son fanm aret zwe gro madanm. Be wi fodre mon fer li arete e Anzel aret koz sa Remon labous plen." Kan Edme ti fini dir sa i ti fer en gran riye e kontiny son larout. Alafendefen i ariv kot son destinasyon byen fatigue. I fer son figir parey en dimoun inosan ki'n ganny akize devan lakour lo en sarz krim.

"Bonswar, bonswar msye madanm manmzel," i dir. Bann dimoun ki pe bwar anba langar i reponn, eksepte Flosi. Flosi i kontinyen bwar son baka san antren Edme menm si zot ti abitye bwar kalou tou le zour kot koperativ Ans Poulble kan zot sorti e avan al travay. Sa ki son manman in rakont li in fer li dekouver ki Edme pa en bon dimoun pour frekante. Edme i war drol aköz son bon zanmi pa koz avek li ozordi. Apre tou sa gran faver ki i'n fek rann son manman pour tir li dan zafer lapolis. Pa posib. I bezwen annan keksoz ki pa mars byen.

"Flosi konman sava mon ser?" Edme i demande pour fer sir ki Flosi i tann li.

"Mwan mon byen," Flosi i reponn konmsi i pa anvi.

"Zot nou fase? Mon dir bonswar konmsi mon pa'n tann ou reponn."

Flosi pa antren Edme plis ki sa. I kontinyen koz avek bann dimoun obor li. Edme i santi konmsi son latet i vin tro lour pour son likou siporte.

Apenn si son lipye i oule leve pour avans kot lakwizin kot Anzel son lot dalon in asize lo peron, li osi avek son lanmen apiye anba son lanmaswar avek en lanmok baka obor li. Toudmenm Edme i sey aproz. Fanm pa tonm koumsa, si son pli bon dalon i refize koz avek li i a bezwen rode aköz e i a fer Anzel rann li son larzan deswit. Kot i pou gannyen, sa son zafer.

"Zot mon ser konmsi ou dan en gran traka ozordi."

“Zot Edme koumsa ou ti la?” Anzel i reponn,

“Be wi mon ser, mon fek arive.”

“Ou oule dir mwan deza kat er in sonnen?”

“Non kat er pa ankòr sonnen me mon’n demann ou zann pour mwan mont en pe boner. Mon’n fer li krwar ki mon pe konmans ganny en pti lafyev.”

“Zot pa fer mwan mazin sa zonm.”

“Anzel pa koz for, taler son boper a tann nou.”

“Zot wi mon’n bliye, pa zis son boper, son belser osi.”

“Zot Anzel ou oule dir mwan kantmenm Remon fek fer problemm avek Flosi yer, Flosi a dir li si i tann ou pe koz li?”

“Mon ser pa koze, sa piti mon pa konnen ki Remon in donn li pour manze, mon krwar i’n ganny andoye parey son gran ser.”

“Zisteman, mon ti pou demann ou si ou’n al sey dir li ki pe pase.”

“Non mon ser, mon pa ankòr ganny letan ariv kot li e la in tro tar pou al laba.”

“Wi mon ser ou annan rezon, donn mwan en lanmok mon a sezi sa lafatig.” Edme i azoute.

Anzel i al dan lakwizin e sorti avek en lanmok baka, i donn Edme. Edme pa tarde pour fer sek sa lanmok e i demann lot. Anzel i donn li lot e dir, “Asiz lanmenm lo sa pti ban ou a donn mwan en pe konsey kimannyer mon pou al fer sa fanm kit sa zonm lavi.”

“Me zot Anzel, en gran fanm konman ou, ou pa kapab fer ou piti ranmas son pake e desann kot ou?”

“Mon dakor Edme, me i bezwen annan en konmansman pour fer li war en rezon ki i bezwen kit lakaz son mari san ki zot ganny en diskisyon.”

“Ki diskisyon ki fodre zot gannyen? Ou pa i konnen tou sa lavi

ki Remon pe fer e Bib pa in dir ou yer swar?”

“Ou a dir mwan i pou oule krwar mwan mon ser?”

“Si ou pa kapab mon a vin avek ou demen.”

“La wi ou pe koz parol. Demen alor.”

“Demen ki ler ou pou ale?”

“Demen granmaten avan soley i tro for. Vin zwenn mwan, nou a tap de lanmok ki sek, pour nou ganny lardyes avan nou monte.”

“O.K. Kont lo mwan. Mon a les Remon desann apre mon a vini.”

“Ou ganny li mon ser. Ou fanm.”

“Zot mon ser zafer kimannyer ti pase? Mon ti’n bliye.”

“Zot Edme ler Bib i ferm son lizye nou fouti. Mon ti’n fini krwar mon piti pou al dan prizon. En ler kot mon ti’n asize dan ban, konmsi mon ti pe asiz lo en ros so. Ler mon piti i leve pour al dan boks, i lev son lizye i get mwan, mon de larm i koul volonter. Apre mon dir non, Bib pa pou les mon piti kondannen.”

“Pov ou mon ser, konmsi mon santi ou douler,” Edme i dir lo en ton fer lapenn.

“Wi mon ser ou konn nou manman avek sa leker feb. Me apre ler ziz ti pre pour rann zizman mon ti santi otreman. Mon piti in kondann en pti lanmann, me son zanmi in kondann prizon.”

“Ar... zot pov piti. Konbyen letan in kondannen mon ser?”

“Zot mwan osi mon’n bliye, me konmsi pa plis ki trwa mwan.”

“A, sa taler i a sorti.”

“Be wi trwa mwan i pas konmsi lapli vannswet. Sepa si i pou ganny letan konn gou prizon.”

“Mon ser dwatet la ki Flosi in plere.”

“Zot pa koze, en ler ti’n fer mwan lapenn.”

“Zot i kapab pa fer lapenn. Ler ou war ou piti pe soufer? Tousala se lafot Remon. Si i pa ti’n pous sa piti, petet gard pa ti a’n aret zot.”

“Anfen mon ser Bondye ki met, demen nou a war sa. La mon

bezwen al met mon morso diri lo dife.”

Anzel i leve e antre dan lakwizin. Edme i donn li son lanmok e demann li pour ranpli ankò. Ler Anzel i rann li lanmok i al asiz kot lezot dimoun anba langar.

Dan bann pye koko, segonn par segonn, minit par minit bann marten ki sorti rapaze dan pye piman, pye kannel ek lezot pye fri pe prepar zot pour lannwit. Parey labitid zot ranpli sa kanton avek zot sanson anmezir ki fernwar i pran plas lizour. Wi sa letan kot laplipar imen i repoze, fer bann refleksyon, fer zoli rev, parfwa bann ki fer per, sa letan kot lanmour senser i aparet san krent, san laprid, bann zorey i tann bann parol dou e osi plizyer mansonz.

Wi fernwar soutirer bann voler, soutirer liberte bann sat ek lisyen maron, liberte bann timid, soutirer kankan dan fanmiy, liberte lalin ek zetwal, liberte lalimyer ek lennmi labote lanatir. Fernwanr li ki konn milyar ek bilyar sekre, li ki’n temwen plizyer levennman sekre. Lannwit in arive, tou dimoun pe repoze, sakenn lo zot lili dan lasanm me Anzel in dormi zis de er-d-tan apre ki i’n aret bwar. I ankò minwi e son sonmey in fini fannen. Menm i’n sey sanz kote plizyer fwa zanmen in ganny en bon pozisyon pour li repoze.

“Me Anzel, les ou kanmarad repoze.”

“Be Edwar ou dormi avek mon lizye ou?”

“Zot me en martir avek ou kan n’ariv aswar!”

“Zonn o gete. Mwan mon annan mon douler ase fatig mwan.”

“Ki douler? Douler ou ganny zis aswar kan n’ariv minwi pour anpes ou prosen dormi. Ler lizour i fer ou konmans antonn lapire san en pozman.”

“La napa ki ou pa pou dir. Ou pre pour dir mon tro bwar.”

“Anzel mwan mon pa pou dir ou aret bwar ankò me mon dir ou les mwan dormi. Ou ase gran pour konn sa ki byen ek sa ki mal.”

“Edwar ase fatig mon latet avek ou bann parol ensiportab.”

“Wi, ou osi ase fatig mwan avek ou loder larak.”

“Gete, si ou war mon fatig ou al dormi ater.”

“Si ater ki ou oule mon dormi, mon a leve obor ou.”

Edwar i leve e alim lalimyer. I pran son zorye ek son tapi i tal lo en nat ater dan lasanm i dormi. I pa tenny lalimyer akòz i konnen ki son ler soufrans in arive. Apenn de minit pti sonmey i konmans met lanmen lo li, me pa pour lontan. Lo lili lefe lalkol pe enteronp son viktim.

“Edwar evant mwan en pe mon mari.”

“Me zot Anzel dormi, les ou prosen repoze.”

“Edwar mon malad, mon ieker i anvole, mon feb.”

“Ou bezwen feb Anzel, akòz ou pa oule manze. En dimoun pa kapab viv zis avek bwar.”

“Mon’n seye manze i pa oule antre.”

“I pa pou antre menm, ou trip in fini sere e divan in tro bokou dan ou lekor.” Lo lili Anzel pe tranble avek lafengal. Son lizye ki pa ti tro blan, in vin pli rouz. Transpirasyon pe devide lo li konmsi i fek sorti anba dous.

“Edwar mon ganny so, mon ganny fre, mon per, mon tann dimoun kriy mwan deor. Zot pe dispit, mon tann piti kriye. Ou a dir pa Zozefin ki’n ganny bate avek son mari?”

“Anzel napa person ki pe koze deor. Dormi ase fatig mwan.” Anzel i leve e vin asiz ater obor son mari.

“Edwar mon per. Vin dormi kot mwan mon seri.”

“Me zot Sennyer sa i plis ki en martir sa.”

“Edwar al rod kivet mon anvi vom. Degaze.”

“Me Anzel al lasanmben al vom.”

“Mon pa kapab leve mon lipye i tro tranble. Ed mwan.”

“La mon ou mari. Taler ou fek pous mwan obor ou.”

“Seri fer sa pour mwan.”

Edwar i lev asize e get son fanm dan son figir pour en pe letan, apre i al sers kivet e met devan Anzel. Apenn ki i fini tir son lanmen, Anzel i konmans vomi konmsi piti golan. Pli i vomi prezan ki i anvi vomi. I vomi zis delo lapire, lekim ek disan. I vomi ziska i plere. Edwar pa kapab tenir.

“Mon fanm si ou pa arete avek sa bwar ou pou mor. Ou fer mwan lapenn ler mon war ou pe soufer koumsa, arete.”

“Wi, mon seri mon pou arete me fodre mon ganny en lanmok pour mwan kapab repoz en pe mon latet.”

“Wi mon konnen, me promet mwan ki sa enn i dernyen.”

“Wi al serse deswit.” Edwar i al lakwizin dan sa ennerendi, i al sers en lanmok lapire i donn son fanm.

“En, lala ou lasante, apre al dan ou plas.”

“Zot Edwar, pa koz mwan mirak.”

“Mon pa pe koz ou mirak mwan. Mon pe sey fer ou konpran ki en dimoun ki pa kapab bwar pa devret bwar. Gete mannyer ou pe tranble e ou pe zet ou kosonnyen lo mon plas.”

“Edwar pa bwar ki fer mwan malad, traka.”

“Ki traka ki fer ou bwar e pa manze?”

“A, ase fatig mon latet.”

“Mon pa pe fatig ou latet, okontrer ou ki pe sey fer mwan mor avan mon ler.”

“A mwan mon pa kapab koz avek ou, plito mon al lo mon plas.” Anzel i fini bwar sa baka. Apre ki i’n tranble e rann en pe partou dan lasanm, telman i ti pe fors sa lanmok ariv kot son labous i mont lo son lili e i dormi kartye fannen. Edwar pa pou vin obor li, alor i kapab fer konman i anvi. Edwar in fatige respir

loder larak tou lannwit ziska bomaten. La i byen kot i ete lo nat litousel, napa bann gro gro ronfle konmsi sat obor li.

Apre ki sa lanmok lapire in afebli nerf sa gran fanm en pe plis, sonmey i profite pour atak li. Sonmey i dan faver Edwar ozordi. I fer sir ki nanm Anzel pa ganny okenn kontak avek son lekor ziska ki Edwar a permet li.

Lannwit in pase e lalimyer en nouvo zour in konmans aparet. Dan pye koko bann marten pe prepare pour en nouvo lasas piman mir ek lagrenn kannel mir. Parey labitid, zot sanson pe donn kouraz bann travayer ki pe desann pour al konmans en nouvo zournen travay.

Pour Edwar son ler travay in arive. I bezwen saroy delo par larozwat dan larivyier ki pa pas tro pre avek son zarden, pour aroz son bann plant avek ki soley i leve. I’n lev granmaten, menm si son sonmey pa ti ankor fini. Pour li sa in en korve tou le zour, menm si i’n al lapes son lavey aswar. Yer swar i pa’n al lapes me i’n bezwen leve tanzantan pour fer dormi son ptibaba swasant an, ki en viktim lalkol. Yer swar pour en nouvo fwa, son fanm in pronmet li ki i pou aret bwar.

Me li Edwar i konnen ki dan letan vannswet, menm si parfwa letan i lour, lapli pa tonbe. I’n fini abitye avek sa bann fo promes ki fer dan soufrans.

Edwar pe aroz son dernyen pye brenzel kan i tann dir, “Bonzour bonzour Msye Madanm Manmzel,” ek en tape laport.

“Bonzour, mon pe vini,” i reponn e i mazin dan limenm,

“Ou a dir mwan lekel sa fanm ki pe vin trakas dimoun granmaten?” Edwar i avans kot lakaz e i war Edme pe debout dan lari.

“Bonzour Msye Edwar. Ekskize pour deranz ou dan ou travay.

Anzel ti'n dir mwan vin kriy li en pe matinal pour nou al fer en pti travay."

"Be Anzel i ankor pe dormi. Yer swar i'n malad tou lannwit avek sa bwar pa manze."

"Zot ou oule dir mwan Anzel i ankor pa oule manze ler i bwar?"

"Mwan mon'n fatigue koz avek li. Ni li ni Flosi pa tande ler mon dir zot ki dimoun ki bwar larak pa larak ki bwar dimoun."

"Msye Edwar kekfwat zot annan kek problem e zot latet i fatigue, alors zot bwar pour sey bliye."

"Edme pa dir mwan bwar i rezoud problem. Mwan mon pli krwar i ogmant problem. Zot ganny problem akoz zot bwar."

"Me Msye Edwar mwan mon bwar mon pa ganny okenn problem mwan. Mon dormi byen, mon travay byen e mon sanz byen."

"I annan en lot ki mon pa'n tann ou nonm ditou. Manze. Ou manz byen?"

"A sa mon pa fatig mwan avek sa, ler mon ganny letan mon kwi e si mon pa ganny letan mon bwar de dizef kri e mon al dormi."

"Ou krwar de dizef kri i ase pour en repa?"

"Be byensir Edwar. Dan en dizef i annan en kantite fortifyan."

"Mon dakor i annan fortifyan dan dizef, me mon pe dir ou i pa sifizan pour ou lekor."

"Msye Edwar mwan mon pa en gran manzer pour kriye."

"Mon dakor, me sa ki zot pa realize se kan zot pe bwar tou sort kalite larak, zot pe osi perdi vitamin dan zot lekor."

"A, vitamin? Sa kan mon a malad dokter a donn mwan pilil e konmela tousala pa ni peye."

"Ou annan rezon dir sa. Kan nou ganny dokter ek latizann pour naryen nou pa bezwen pran ka avek nou lasante. Ou pre pour dir mwan ki dokter pour naryen i a rann ou en lot lavi apre ki ou'n perdi sa enn."

"Msye Edwar sa ou pe koz mwan mirak."

"Non, mon pa pe koz ou mirak, me mon pe sey fer ou war ki ou pe met responsabilite ou lavi dan lanmen en lot dimoun."

"Zot o, mwan si mon ti pou mor avek bwar lontan mon ti a'n pouri."

"Mon dakor avek ou, me tasyon menm si i pa kapab touy ou i fer ou envalid."

"Mon pe rode sa larak ki kapab fer mwan andikape. Ziska prezan mon pa ankor zwenn li."

"Tasyon ler ou zwenn li i tro lour pour siporte."

"Msye Edwar les mwan sey fer ou konpran en keksoz. Mwan mon reste mon tousel. Mon napa piti pour sonnyen, mon pa al okenn lezot lanmizman. Si mon pa bwar ki mon pou fer pour egey mwan?"

"Mon dakor, me i pou fer ou dimal Edme. I pou touy ou avan ou ler. Sey konpran mwan."

"Lekel? Mwan? Mon napa okenn problem bwar. Zis en ler mon napa lapeti."

"Be wi napa lapeti pa en problem. Zot bann lanbik zanmen zot napa en bann gran gran rezon pour zot kasyet deryer." Avan Edwar i fini koze laport lakaz i ouver e en zenn fiy tou devergonde i aparet devan laport e asiz lanmen lo peron avek son latet bese dan direksyon son lipye.

"Get sa enn," Edwar i azoute, "i pa ankor zenn in vye." An dizan sa Edwar i devire e al kontiny son travay. Edme i santi li en pe pli lib pour demann sa ki i ti anvi rode.

"Zot ki i dir mon ser? Konmsi ou pa byen."

"Zot, Edme mon ser konmsi pa ti demann mwan leve."

"Zot pa koze. Ou leve ki ou a fer. Mwan osi si mon pa ti bezwen vin zwenn ou manman, mon ti a ankor lo mon payas."

"Be ki sa? Ou pa pou al travay ozordi?"

"Non mon ser, ozordi mon pa pou ale. Okontrè donn mwan en lanmok mon a aranz mon latet."

“Zot wi. Mwan osi mon pou bezwen pran enn avan mon al bros mon ledan pour mwan ganny keksoz pour vomi lo mon lestoman.

“Mon ser ou osi ou ganny sa bann move lanvi vomi dan bomaten ler pour bros ledan?”

“Pa koze. En ler si mon mazin sa mon pa pou atrap brosan. Parfwa mon vomi ziska sa disan ovif.”

“A disan mwan preski tou le zour mon vomi. Me ler mon’n tap enn mon pa tande.”

“Mwan prezan mon’n konn en teknik. Mon bag enn avan e ler mon vomi mon ganny keksoz lo mon lestoman. Si mon pa ganny enn, martir. En ler si pa ti akòz sa pti loder ni benmyen mon pa ti pou benmyen.”

“Sanmenm mon war ou ankor dan rob-de-sanm.” Zot fer en gran riye, apre Flosi i dir, “Zot ase vey mon zaksyon.” Flosi i antre dan lakwizin e i sorti avek de lanmok lapire.

“La ou la mon ser. Tap sa vitman mon a donn ou en lot avan mon lev Manman.”

“Wi. Ou fanm.”

Enn lo peron lakwizin e lot lo peron lakaz pour swadizan aranz latet. Menm ki li osi i pre pour kas son ledan avek bor lanmok i dir, “Flosi mon ser tasyon. Ou pe zet tou lo ou lenz.”

“Zot wi. La fodre mon fini sa enn pour mwan aret tranble. Be ou osi tasyon ou ledan i reste avek bor lanmok.”

Tou le de pe sey pran ka avek kanmarad san ki zot kapab war ki zot viktim i sa ki dan zot lanmen. Sa zot swadizan rekonfor ki zot bezwen tou le bomaten pour rann zot lavi itil. Sa ki zot mazin se zis en lanmok ki kapab rann zot ere, san ki zot sey konpran ki zot in vin enn son prizonnyen. Pour zot sa de pti remark ki zot in pase avan i zis pour fer riye, i zis en fason pour konmans lazournen. Konman zot in met enn, zot fini bliy sa disan ovif ki zot ti fek perdi apre ki zot ti sey bros zot ledan e forse

pour sey vomi plizyer fwa.

Zot fini sa enn e Flosi i al ranpli lot de. I bliye si ti pou zis enn avan i al lasanmben. Tiyo in ouver i bezwen ranmas otan delo ki i kapab. Zafer lasanmben pli tar petet a ganny konsidere.

Lalimyer soley ant rido par louverz i enteronp sonmey en lot viktim lalkol kot i ankor pe ronfle kartye fannen lo lili dan lasanm e fors li leve. Menm si i’n sey vir dan plizyer direksyon, soley pa’n donn li sans kontinyen reste lo son prop lili. Si i oule kontinyen fer son pares, fodre i sanz plas. Flosi ek Edme deor pe fer bann gran gran riye konmsi zot ti pe lave larivyer e sa tapaz pe enteronp Anzel. Menm ki i ti pou deside sanz plas i pa pou kapab, akòz konmsi zot ti pe riy apepre en santimet avek son zorey.

Wi, i pou bezwen leve, akòz konmsi en dimoun ti’n vid en seo delo fre lo li. Son lekor ek son plas i tou tranpe avek transpirasyon. Osi en loder pisar kekpar pe fatig son nennen.

“Zot ou a dir mwan en grannwanr parey Edwar in kapab pis lo lili?” i dir litousel. I deside pour verifye en pe plis. I tat dan plas Edwar e i dekouver ki i sek, me son lanmen ti fer li prouv laverite apre ki i tat byen partou lo li.

“Zot mwan menm ki’n pise. Me akòz mon pa’n santi? Ou a dir mwan pa Edwar ki’n pise apre pour li dir mwan?”

Finalman i pran en desizyon. I redi son lekor en pe, tir pares apre i sot ater e diriz ver laport ki ouver an fas avek lakwizin kot son fiy ek son gran zanmi pe esper li avek pasyans. Anzel i aparet devan laport konmsi en dimoun ki sorti fer en travay byen dir. Son lizye i rouz konmsi pizon, son rob-de-sanm mouye kole

avek son lapo ki montre tou son lekarir fanm. Son piti ek zanmi i get li konmsi zot in war nanm.

“Zot, oli Edwar?” i demande.

“I dan bitasyon mon krwar,” Flosi i reponn.

“Edme mon ser fanm in anbarase. Ou konnen mon’n pis lo mon plas yer swar?” Tou le trwa i bat lanmen en fwa an fezan en gran riye e Edme i demande, “Konmsi ou’n pas dan ben yer swar?”

“Pa koze, sa maladi nerf in rabat mwan tou lannwit. En ler mon’n bezwen sipliy grannwanr pour al rod en lanmok lakwizin pour mwan ganny en pti sonmey ziska prezan.”

“En zafer avek sa pa ganny sonmey aswar. Mwan sanmenm zanmen mon pa mont avek mon pti galon plen. Koumsa kan sonmey pa vini, mon bag en pe.

“Mon ser ou ou napa personn pour mangonn avek ou dan lannwit, me mwan si Edwar i santi mon pe bwar okenn lalkol e menm si mon deor dan lannwit i konmans mangonnen zanmen fini.”

“A ou ki annan letan avek tousala. Ou les zonm domin ou lavi. Ki ou dir Flosi?”

“Mwan mon pa kapab mel dan zafer gran dimoun mon ser. Mon zis ekoute.

“Non, zot mon bezwen al lasanmben en kou, apre nou a koze,” Anzel i dir e diriz dan lasanmben ki lanmenm akote lakwizin.

“Pa tarde, mwan osi mon pe vini,” Flosi i dir li.

Anzel i fer son twalet avek souffrans e finalman i ariv ankor kot zansla pe asize avek sakenn en nouvo lanmok lapire. I paret ki Anzel in bliye si zot ti pou al kot Zozefin ozordi byen bomaten. Me Edme pa’n bliy son lide mesanste ditou. I pa pou zanmen les son kanmarad viv pli byen ki li in deza viv. Fodre i fer sir ki zot

soufer, san pran okenn pitye pour sa de pti inosan. Son lide mesanste i fer li reviv son zenntan, kot i ti viv en lavi ensiportab avek son mari. Li, zanmen ti ganny letan fer bann pti lanmour parey. Li, zanmen ti ganny letan tenir en bon konversasyon avek son mari si zot pa ti fini avek en kankan. Li ki zanmen apre son maryaz in gout kares son mari. Li ki zanmen in fer lanmour son vant plen. Li ki zanmen in fer lanmour avek en konsyans prop san lalkol. I’n donn tou son bann sans lalkol e prezan i’n nepli kapab. Son mari in mor. Lekel ki pou oule kares en vye lakord parey li? Kimannyer i pou fer letan pase retournen? Non sa fanm pa pou kapab kontinyen fer son leker gonfle. I bezwen separ li avek Remon. Koumsa nou tou nou a parey.

“Anzel ou pa pe bliy nou randevou?”

“Zot ki randevou mon ser?”

“Mon ser sa ki grannwanr dan leo ti dir ou fer apre zafer Flosi.”

“Zot, pa vini menm dan mon nide mon ser.”

“Anzel pa dir mwan ou’n bliye ki ou piti i dan problem.”

“Anrr..., zot wi, be ou konnen mon ti’n fini bliye mon ser.”

“Zot pa fatig zot avek mwan zot. Mwan, nou de Remon nou abitye ganny nou pti problem, apre nou byen,” Flosi i dir.

“Nou pa pe koz lo ou. Ou demerd ou avek ou Remon. Kan i a tro ou a gete ou menm,” Anzel i reponn

“Esper mwan de minit, mon a pas en sifon dan mon latet apre nou a monte.” Anzel i antre anndan i met son servyet dan son latet e i sot deor.

“Ekoute Edme, fodre mon met en bon stim avan nou monte. Ou Flosi tripot touzour kot lakour. Si ou papa i rod mwan, dir li mon’n al magazen.”

“Pa bliy mwan ler zot monte. Anmenn enn for pour mwan.”

“O.K. nou pa pou tarde,” Anzel i dir.

Zot fini bwar ankor sakenn en bon lanmok lapire e zot pran

semen pour al kot Zozefin. Konmsi Edme pe akonpli son krim, son latet i dan sa direksyon kot son leker kriminel pe pous li. Zot ariv kot lakaz byen fatige e transpire. Zot pa war personn kot lakaz lot ki Venker ki pe anpes zot koste e fer son met konnen ki i annan tranze pe koste lakour. I pa fasil pour antre kot Remon si Venker in santi ou loder. Ou pou bezwen ganny permisyon en dimoun ki reste la kot lakaz. Venker pa en lisyen ki manz manze son met pour naryen. Son kouler nwar parfwa pa permet son viktin dekouver li. Menm ki zot ti'n fer plan pour dir bonzour dan lari, Venker pa ti permet zot ni avanse ouswa rekile. Finalman zot bezwen anvoy lavwa. Tou le de ansanm i kriye,

"Bonzour, Msye, Madanm, napa personn isi?"

"Bonzour, mon pe vini," en lavwa byen kler i reponn deryer lakaz an vinan dan zot direksyon. Trant segonn pli tar en zenn fanm avek en zoli sourir lo son figir i aparet, avek en pti fiy dan son lebra. I sorti direksyon deryer lakaz e i reprimann Venker.

"Venker arete, pas dan ou plas, les zot."

Venker i obei e sa de malfeter i koste lakaz vitman avan Venker i sanz son lide." Anzel i get son fiy avek en regar ladmirasyon konmsi i pa tro sir ki i ti pe vin fer la kot son piti. Son lanz gardyen i profite pour fer li remarke ki sa zenn fanm ki pe debout devan li pa enn sa kalite fanm pas martir parey son zanmi ti'n dir li. Konmsi i pa tro sir si Zozefin menm ki i pe gete devan li.

"Zot ki sa divan ki'n anmenn zot isi granmaten ozordi?" Zozefin i demande. San dir en mo zot get kanmarad tou le de.

"Ki'n arive? I annan lanmor, malad zot pa oule dir mwan?"

"Non mon piti mon'n anv i war ou en kou. Akoz? Ou pa kontan?"

"Mon kontan me mon war en pe drol ki Edme pa'n al travay our vin avek ou."

"Mon ser ou pa konnen ki nou de Edme kot nou ale nou ansanm? Mon pa'n oule mont dan sa prin mon tousel. Avek sa

bann bandi ki annan konmela mon pa'n fye. Mon'n demann li pour vin avek mwan."

"Be asiz touzour mon a fer en pe dite pour zot."

"Pa trakase mon piti. Nou pa pou bwar dite la, petet en pti labyer si ou annan."

"Manman zot pou kapab bwar labyer granmaten?"

"Be mon piti la ler bwar in sote la."

"Mon pa asire si i annan labyer me i annan en boutey zin ki nou ti aste depi zour batenm Marta. Mon a debouse e donn zot en pe."

"Zot! Tou sa letan bwar pe dormi la avek zot?"

"Be sa ki pou bwar sa Manman? Ou pa konnen mwan mon pa antren sa? Kekfwa Remon zour i a mazin en i a pran en pti morso dan en ver. Apre kan ou pou war li pe antren sa ankor? Zozefin i donn Marta son granmanman e i dir, "Mon pe vini."

Lanz gardyen Anzel i penetre sa bann lalkol ki'n kouver son lespri ek son leker ankor en fwa. En lavwa i koz dan son lespri dousman, "Anzel get ou pti zanfan dan ou lebra. Pa en zoli pti fiy byen prop e paret ere? Si ou arive fer sa ki sa move lide in anvoy ou fer, ki pou ariv sa pti fiy byen ge? Ou pou kapab fer sa zoli sourir ki egziste lo son figir kontinyen egziste?"

Sa lavwa i vir son latansyon dan lanvironnman lakour. "Ou pou kapab rann ou fiy ek son zanfan en lakour ek en lanvironnman parey? Get byen partou, mayok bannann tou kalite, patat, legim ek sa bann zoli fler. Get lenz ki ou fiy i mete pour travay ladan kot son lakour, pour ou al lanmes ladan ou pa gannyen. Sa ki ou apel en fanm martir? Ou rekonnet ki en betiz ki ou pe vin fer?"

Anmenmtan ki lanz pe sey montre Anzel kot i mal, demon pe travay serye avek son dalon. Edme tou sa letan pa ankor koze. Son leker i pre pour pete avek zalouzi. I get partou partou konmsi

i'n perdi keksoz. Tou sa ki i trouve i bles li, i fer son laraz ogmante. Son demon i profite pour sezi li byen for ki son lanz gardyen in bezwen kit li sa moman e dan son lespri napa ki byen, napa pitye pour person. Sa ki i mazine se zis fer tou son posib pour separ sa fanmiy, kas en maryaz ki dan bon direksyon, fer soufer de pti inosan.

Petet en lot fanm a ganny tou sa. Me pa Zozefin, en piti ki'n pas tou son lanfans devan li ki pou zwe gran deryer dan son legzistans. Sa en keksoz ki i pa pou kapab siporte. Li Anzel konmsi i pe pran tro letan pour koze. Konmsi i en fanm ki napa kouraz. Konmsi i'n fini vin kapon kan i'n war sa zoli rob ki lo Zozefin. Non, Edme pa kapab siporte.

“Anzel be ki'n arive avek ou? Ou pa dir li ki nou'n vin sers li?”

“Ekoute mon ser nou pa kapab dir li an gran.”

“Kwa ki ou pa kapab dir? Nou pa in mont pour sa?”

“Wi, me fodre nou konn mannyer pour dir en keksoz koumsa en zenn fanm ki pa pe ekspekte en keksoz parey.”

“Gete, si ou pa pou dir Zozefin naryen, mwan mon a desann.”

“Non mon ser ekoute. Mon pe fer mon latet travay en pe avan.”

“Zot ki zot pe diskite zot de?” Zozefin i demande an sortan anndan avek en plato ek de ver preski plen ladan.

“Pa en gran zafer mon ser. Nou pe koz lo ou menm,” Edme i reponn.

Zozefin pa pran sa an mal. I fer en pti sourir e i demande, “Ki zot in tande lo mwan ki zot pe tarde pour rakont mwan?”

Anzel i santi konmsi i dan en nespes latrap. Son labous pa oule ouver pour koze, me pa Edme. Li i napa naryen pour trakase. Sa letan ki i ti pe espere in arive. Fer in so annou bate. Dabor i

pran son ver lasante batenm e i dir mersi. En pti grog a donn li plis kouraz pour fer son aksyon kriminel.

“Sa wi mon ser ou konn keksoz. Asize ou osi koumsa nou a kapab koz pli byen.”

Zozefin i konmans doute ki i annan keksoz ki pa mars byen. I pran Marta avek son manman e li osi i asiz dan en lot fotey drwat devan sa de raporter. Edme i fer desann en bon gorze e i kontinyen, “Mon ser mon pa dir ou fer mwan ganny diskisyon avek mon bourzwa, ou konn sa banri zonm konmela kimannyer zot ete. Mwan mon pa kapab lager, me mon leker i tro fermal ler mon war ou dan sa sityasyon parey.”

“Ki sityasyon? Mwan mon byen.”

“Wi mon ser ou paret byen me mon a les ou manman rakont ou plis.”

Menm si i pa oule bles son piti, menm si Anzel pa ti kapab siport sa teknik Edme, son labous pa oule ouver pour koze. Konmsi i annan en patat so ladan. Edme i repran laparol.

“Anzel koze mon ser, ou piti pour ou sa. Ki ou pe espere?”

“Wi mon ser mon vin sers ou, parske mon pa pou kapab les zonm fer ou yonyon dan lakaz.”

“Ki zonm manman?”

“Ou mari. Ou pa konnen i annan son lot fanm kot i travay Ans Lanmous?”

“Fanm, fanm? Ki fanm zot?” Zozefin i demande avek en lavwa ranpli avek sezisman. Edme i remarke ki febles in fini atak son viktim. I profite pour aforsi son latak.

“Ou pa i konn Monik ki travay avek Remon lo laferm? Sa pti piten in annenn Remon ziska i'n nobou fer ou ser ganny pouse

avan yer dan travay pour li ganny plis sans fer son lavi avek Remon dan biro tou lazournen. La sa de zour i pa sorti dan sa biro zot de Remon.”

“Pa zis pouse, ek en gro zafer lapolis,” Anzel i azoute.

“Zot mon pa konnen ki mon pou dir zot. Mon pa pou krwar si Remon a fer en keksoz parey.”

“Me mon ser, ou pa pou krwar menm, kimannyer i’n fer ou,” Edme i fer sorti.

Sa premye leksperyans soufrans lavi maryaz ki enterfer par mesanste i tous leker sa zoli fanm, ki de trwa minit pase ti dan lazwa. En larm san ses i kit son sil lizye pour mouy son zoli figir e pli tar latet son piti ki asize lo son lazanm. Zalouzi ki egziste dan lanmour pour son Remon, sa sel zonm ki i’n kontan dan son lavi, i fors li eksprim li devan sa de fanm ek son piti ki pa’n zanmen war son larm penetre son lizye.

Dan en lavwa melanze avek soufrans an pleran i dir, “Remon, Remon, mon sel Remon, akòz Remon ki mon’n donn tou mon lanmour? Akòz mon sel mari ki kontan mwan? Non enposib, mon pa pou krwar, non sa pa posib.”

“Mon ser i fer ou krwar i kontan ou pour ou pa remark son pitennri,” Edme i dir.

“Be wi tou sa bann zonm zot koumsa. Zot parey bann mal lisyen avek lalin kler,” Anzel i azoute.

Pa sorti lot keksoz ant lalev tranble Zozefin ki en lavwa an pleran. I’n ser son piti avek li e zot plere. Menm ki Marta pa’n konpran konversasyon, i war li dan en pozisyon anbarasan. Zanmen pandan sa sis an ki i’n viv i’n war son manman soufer. I pa konnen ki pe arive. Son sel sekirite se son manman ki ankòr pe bers li konmsi en ptibaba kan i malad. Si i ti’n al lekòl i pa ti

pou dan sa sitiasyon. I pas son lanmen dan figir son manman e i demande, “Ki zot fer ou manman? Pa plere. Mon per.”

“Mon piti mon leker i fermal. Mon latet i fatige. Mon pa konnen ki mon pou fer.”

San pran pitye pour sa de leker desire par son krim, Edme i demande, “Ou pa konnen ki ou pou fer? Ou annan manman, al kot ou manman, en zoli fanm konman ou, ou a les zonm fer ou fol? Les sa pour mwan ki napa. I’n kontan kit pounak pour manz kourpa les li.”

“Ou annan rezon mon ser, zonm pe vann dis pour de kas lo koltar. Son de piti i pou bezwen sonnyen. Si i pa oule ou a fer NCC get li.”

“Get ou pti ser, son lanmoure in al dan prizon i pa pe fatig li pour plere. Okontrè prezan ki i anmize,” Edme i azoute.

“Zot mon pa pou kit Remon pour personm mwan, mon kontan mon mari. Zot Bondye ed mwan.”

“Mon piti les Bondye trankil. Bondye pa konn naryen dan ou zafer. Fodre ou ed ou pour Bondye ed ou,” san laont Edme i dir.

“Be wi, eksa li Edme lontan i konnen ki pe pase i pa dir mwan. Si nou pa ti al fer en gete pour Flosi, mon pa ti pou konn naryen. Ler sa grannwar i get dan son laglas e konmans dir mwan tou sa bann keksoz an detay ki i koze.”

“Zot mon ser pa ou konnen mwan mon pa kontan fer diskisyon?” Edme i reponn.

“Sa pa diskisyon Edme. En zonm pa kapab krwar tou fanm pour li,” Anzel i dir.

“Zot wi. Li pov fanm i pe rente kot lakour, kan son mari pe anmize avek lot fanm.”

Edme i remarke konmsi son plan in fer lefe. Zozefin nepli gel for. Prezan zis i pe ris ris leker konmsi i dan leral. Prezan i a tann

pli byen ki zot pe dir.

“Anzel sa Bib pa fer zouzou avek tir kart en mon ser? Ou konnen i rakont nou sa levennman konmsi i pe get son senk ledwa?” Edme i dir.

“Mon ser sa ki konn son louvraz i konnen menm.”
Zozefin anvlope dan pyez son lennmi i ris en gran lespirasyon e i demann avek son piti, “Marta mon piti ki ou pou fer?”

“Mon piti les Marta trankil. Li i pa konn naryen. Ou ki pou fer ou desizyon. Ou pa premye dimoun ki kontan. Pa premye maryaz ki kase. Pa zis ou ki konnen ou kontan Remon, mwan osi mon konnen ou kontan li. Me mon leker i fermal war dimoun fer ou koumsa,” Anzel i dir.

“Mon ser i vre sa ki ou manman pe dir. Mwan osi mon pa kontan ditou kimannyer Remon i fer avek ou. Yer swar ou pov manman in malad tou lannwit apre ki i’n tann tou sa bann parol.”

“Mon krwar zot pou touy mwan avan mon ler,” Anzel i dir.

“I pou desann Anzel. Donn li letan reflesir. Ase fatig ou latet ou osi, taler ou asma a leve.”

“Mon pa konnen ki mon pou fer. Premye fwa mon dan en sitiasyon parey,” Zozefin i dir.

“Pa trakase mon ser nou a ed ou anmas ou pake.”

“Ki pake? Mon pa pou pran okenn pake mwan.”

“Gete ou menm, me mon pa oule war ou pe koz avek Remon. Be ou lenz? Ou pou kit ou lenz pour lot fanm mete?” Anzel i azoute.

“Mon pa konnen si mon pou kapab reste kot ou pour lontan Manman.”

“Akoz? Nou’n deza pous ou dan lakour? Kot mwan in tro fay pour ou?”

“Mon pa pe dir ki mon pa kapab reste kot ou Manman, me nou pa’n ganny naryen nou de Remon pour mwan kite avek li.”

“Zot o piti pa fer mon lakoler monte. Ase parey en boufon. Ou pa tande ki nou’n fek rakont ou?”

“Ekout ou manman mon piti. Pa bon dezobeisan. Si Remon i vreman kontan ou i a vin rod ou. Fer li santi ki ou osi ou annan disan,” Edme byen satisfè i dir.

Menm si i pa tro asir sa ki zot pe dir li Zozefin napa lot swa. I tousel zot de Marta. I pou bezwen ekout zot konsey ziska i war Remon pour konn laverite. Tou kraz kraze Zozefin i leve kot i ti pe asize.

“Manman tyonbo Marta mon a anmas mon lenz.”

“Met li ater, en gran piti koumsa.”

“I annan en pti lafyev avek li. Mon pa oule met li lo sa estik fre.”

“O.K. anmenn li.”

“Non mon pa oule ou tyonbo mwan,” Marta i dir an risan lanmen son granmanman.

Zozefin i bezwen anmenn Marta anndan avek li. I anmas son lenz ek pour son de piti an kontan de trwa keksoz nesese ki i kapab mazine. I fer en sel pake anmare dan en gran dra blan e i sot deor.

“Sanmenm tou ki ou annan? Zis en pake lenz?”

“Manman tou sa ki dan sa lakaz i pour nou de Remon. Sa ki zis pour mwan se mon lenz. Mon pa pou pran naryen ankor san ki nou ganny en koze nou de Remon.”

“Gete Zozefin. Ou napa okenn lord pour ou pran avek Remon. I’n kontan rod son lot fanm les li. Ou osi ou a ganny en lot zonm pli meyer ki li,” Anzel i dir.

“Be sa ou annan rezon Anzel, pa zis Remon ki zonm e fanm pa flat zonm, zonm ki flat fanm. Sanmenm sa ki fer zot pa krwar ki

zot ete. E deplis kan Zozefin pou koz avek li i pou krwar pe demann li pardon,” Edme i dir.

“Annou desann si zot pou desann ase fatig mwan. Zot zot lavenir in fini e zot pe fors mwan pour detrir pour mwan,” Zozefin i dir.

“Pa nou ki pe detri ou lavenir, ou mari piten.”

Sa bann zenn fanm konmela zanmen zot oule ekoute kan zot granmoun i donn zot en konsey. Zot a plito les zonm fer zot marspye,” Anzel i dir.

“Ase fer mon manman plere,” an pleran Marta i enteronpe.

“Zot annou ale tar pe fer,” Edme i dir.

“O.K. Donn mwan sa pake lenz, ou anmenn ou piti. Pa bliye pour ferm sa laport,” Anzel i dir Zozefin.

Pov Zozefin, i pous son laport san take pour son mari kapab ouver ler i arive. I met son piti dan son lebra e zot pran desant borlanmer. Dan karo mayok avan touf prin, Zozefin i vire e get son lakaz ankore en fwa. Son zoli lizye ki’n vin roz avek douler lanmour i mouy son figir en nouvo fwa.

“Mon lakaz ki konn sa lavi gou ant mwan ek Remon. Mon lakaz ki konn tou nou sekre lanmour. Mon lakaz kot mon’n konmans mon devwar fanm ek manman. Lekel sa lot lakaz ki pou kapab ranplas ou? Lekel sa lot zonm ki pou kapab pran plas ki Remon i annan dan mon leker? Mon pa konnen ki mon pe fer. Kimannyer Remon pou anmenn en lot fanm dan nou lakaz? Akoz i rod en lot fanm?” Dousman i koz litousel san war si son de konpannyen pe kit li.

Anler kot lakaz Venker i eksprim li, “woup, woup, woup, Grourrr.” Menm i en lisyen i santi ki keksoz pa tro byen. Ozordi Zozefin in kit lakaz san kares li en pe parey labitid kan i al

borlanmer. Kan Marta i tann sa zape i lev son latet e get kot lakaz. “Venker ase mon boy,” i dir. Apre sa Venker i tonm alonze lanmenm dan lari e Zozefin i kontiny son larout pour al kot son manman san lezot refleksyon.

Minit par minit soley i monte e pran lapant lorizon. Taler 4 er pou sonnen e sak travayer pou antre kot zot apre sa zournen, byen fatigue.

Taler zot pou rezwenn sakenn avek zot fanmiy apre ki zot in kite bomaten. Bann ki napa en fanmiy zot pa trakase. Zot kapab vir vire kaz an kaz port an port ziska ler dormi i arive. Me bann ki annan en fanmiy zot fer zot mye pour ariv kot zot avan fernwar pour tripote sakenn dan son fason. Fodre dir ki i annan osi bann ki pa pran ka pour sey ariv se li menm si i annan en fanmiy, sirtou bann veyer zaksyon ek bann ki abitye sou tou le zour.

En pe pli boner Zan in larg lekol. I ti pe depese pour li ariv en pe boner kot lakaz pour ed son manman avek bann louvraz la konman Marta i malad. I’n mazin en ki ozordi napa en dimoun ki i pou espere pour fer sot larivyer avan i pran montanny pour ariv kot lakour. Me son limazinasyon ti ganny enteronpe par en zenn fiy avek en laparans demi sou kan i ti’n ariv obor lale ki desann kot son granmanman. I ti remark byen ki sa manmzel ki ti pe drive ti son prop tantin. I pa’n azite pour obeir kan Flosi i dir li ki Zozefin pe esper li la kot granmanman. San okenn kestyon i’n desann. Me en keksoz ki i pa’n konpran kan i ti ariv kot lakaz, sa ki i ti dekouver son manman pa ti parey labitid. Zozefin ti pe asize dan en fotey dan salon avek Marta lo li. Kan Zan in dir zot bonswar zot tou le de zot in konmans plere e li ki ti touzour pe rod plis lenformasyon in sey poz son manman kestyon. Me son granmanman ti reprimann li pour aret demann

kestyon granmoun. Avek en lakoler i'n sorti e al plere li osi deryer lakaz kot personn pa war li.

Alafen 4 er i sonnen. Bann travayer pe konmans monte. Bann kliyan in konmans dir bonswar Msye Madanm sakenn zot tour kot Anzel e rekonmann zot lanmok lapire parey labitid pour swadizan pezh lafatig.

Flosi i sey koste son gran ser konman Anzel pe okipe vann baka lakwizin pour li rode ki'n arive. I fer son mye pour personn pa tand deor kan zot pe koze. Dousman i demande, "Ser ki'n arive? Ase plere."

"Ou ou sou, les mwan trankil," Zozefin i reponn.

"Be mon pa kapab les ou trankil san konnen ki pe pase. Ou mon ser. Ou mon disan. Mon bezwen konnen ki pe ariv ou," i persiste.

"Sa ki pe ariv mwan lontan ou konnen," ase fatig mwan," Zozefin i reponn.

"Be O.K. si ou pa oule dir, demerd ou."

Apré sa dernyen parol Flosi i sot deor e al anba langar kot bann dimoun pe bwar, san dir personn naryen.

* * * * *

En sirpriz terib i frap en zonm kouraze e for.

Parey labitid, Remon i deboukle dan touf prin avek son sak dan son lanmen. I lev latet e get kot son lakaz e i mazin, "Ozordi oli dimoun kot lakour. Ki'n arive? Zot tou zot malad?" Sa bann

lavwa ki abitye akey li tou le swar i manke ozordi. Me pour Venker, sa ki i ti pe espere. Enn son met pour akonpany li, pour donn li en pe manze. Depi bomaten i pe vey petet e irle. I vin zwenn Remon dan semen e sot sot avek li an siny kontantman. Me apre ki Remon i dekouver ki laport lakaz i fermen i pa deside les Venker retard li plis ki sa. I aforsi lepa e ariv kot lakaz. Partou i tris san en siny ki i annan dimoun. I deside fer letour lakaz pour gete si zot pa dan zarden, me san okenn laparans personn.

"Kot zot kapab ete? Kekfwa zot pe kasyet mwan dan lakaz," i dir dan limenm.

I fer en pti sourir e avans dan direksyon laport dousman avek lide pour sirprann zot. I ouver laport dousman e antre san okenn tapaz. I get partou kot i kapab, san war personn. I ganny en lide pour get dan lasal-de-ben kot en sok i frap li. Lo lafnet kot tou lezot brosan ti ete i reste zis enn e sa enn pour li.

"Kwa? Oli lezot?" I demann dan limenm. I deside fer plis resers. I al dan lasanm e ouver larmwar kot i remarke ki zis son lenz ki'n byen kraze e boulderse ki ankor la.

"Ki'n arive? Zot Bondye dir mwan ki pe pase. Mon pa kapab pe reve ouswa fou. Non mon pou bezwen konnen ki'n arive."

Remon i sot deor i pous laport e pran larout kot son belmer. Petet laba i a ganny en leksplikasyon kot son fanm ek son de piti zot ete.

Ozordi i mars pli vit ki labitid. Senk minit pli tar i ariv kot Madanm Edwar byen fatige.

"Bonswar, bonswar tou dimoun," i dir.

"Bonswar Msye Remon," Edme i reponn.

“Oli Padwar Flosi i la?” Remon i demande. (Padwar en pti non gate ki tou dimoun i donn Edwar. Sirtou bann ki abitye avek li.)

“Non, Manman ki la, me i pe trafike lakwizin. Akoz? Ou bezwen li? Flosi i reponn e mars dan direksyon Remon.

“Mon pe vin gete si zot konnen kot Zozefin in ale,” Remon i reponn.

“Be ou pa konnen kote i ete?”

“Byensir non mon’n ariv dan lakour me mon pa’n war person e ni zot lenz.”

“Mon frer pa koz for. Avans la,” Flosi i dir dousman. Zot kil en e pli lwen avek lakaz kot bann dimoun pa war zot ni tann zot konversasyon.

“Annou pa koz for pangar zot a tande. Remon mwan mon napa naryen kont ou menm problem ki’n arive dan travay. Mon aksepte ki mwan ki annan tor.”

“Non Flosi ekoute. Sa en zafer ki nou a koz en lot ler kan ou azen. Ou travay mon’n fini diskite avek lotorite konsernen. Mon’n demann zot pour fer zis en let reprimann pour ou e ou kapab retourn travay demen bomaten e nou a koz lo sa. La mon pe vin rod oli Zozefin ek marmay,” Remon i dir.

“Be sanmenm ki mon pe sey dir ou. Ekoute mon bofrer. Ou fanm ek ou de piti zot la dan lakaz. Depi bomaten zot in desann avek manman ek Edme,” Flosi i eksplike.

Aksyon Flosi i fatig Edme. I enkyet. Flosi a riske met li dan problemm avek son bourzwa. I konnen ki Flosi ek Remon i parey golan ek pye bodanmyen. I konnen ki si Flosi in kapab dekouver zot plan i pou devwal tou avek son bofrer e li i pou pas konman zaviron milye. Non i pa kapab reste asize. I bezwen aret sa konversasyon avan i tro tar. I leve kot i pe asize e avans kot Anzel lakwizin.

“Anzel entel in arive,” i dir.

“Lekel ki’n arive?” Anzel i demande.

“Ou zann. Mon krwar i pe rod Edwar,” Edme i reponn.

“Oli li?” Anzel i demann ankore.

“Zot pe koze zot de Flosi obor pye mang,” Edme i reponn.

“Ekoute mon a gete ki i vin rode isi.”

An dizan sa Anzel i sot deor e diriz kot Remon ek Flosi pe koze. Me li Edme i fer konmsi i pa konn naryen ki pe pase. I kontinyen vir vire kot lakwizin avek son lanmok baka dan son lanmen pour ekoute ki pou arive.

“Remon ki ou’n vin fer devan mon laport? Anzel i demande. Remon i soke tann sa kestyon. I pa ti pe ekspekte si son belmer ti a kapab poz li en tel kestyon san en rezon apre sa gran lanmitye ki ti egziste ant zot.

“Akoz madanm Edwar?” i demande.

“Ou ganny toupe demann mwan aköz. Ou krwar ou pli bon zonn ki egziste dan Be Lazar?” Anzel i azoute.

“Madanm Edwar mon pa konnen ki rezon ou pe poz mwan tou sa kestyon,” Remon i dir.

“Pa vin fer mwan krwar ki ou’n bliye ki ou fek pous Flosi dan travay pour ganny plis sans fer ou konmeraz zot de Monik dan biro.”

“Manman pa met mwan dan ou zafer. Zanmen mon’n dir ou ki Remon in pous mwan e si i’n pous mwan sa i mon zafer nou de Remon,” Flosi i fer sorti.

“Ou pa koze. Ou’n manz menm kosonnyen ki ou ser in manze,” Anzel i dir.

“Zot kapab dir mwan ki pe arive e oli mon fanm pour lanmour Bondye e aret fatig mwan plis ki sa?” avek en lavwa sipliyan Remon i demande.

“Ki ou fanm? Demande oli ou dondosya. Mon piti pa pou al ankor kot ou parske ou pa en zonn. Al rod Monik met dan ou lakaz. Zozefin in fatige vin bouyon koko resofe,” Anzel i dir.

Pour Edme tou keksoz pe byen marse. La konman melimelo i opwen in avans pli pre e sak fwa ki Anzel i koze i balans son latet avek en lenpresyon i byen. Me kan en lot i dir keksoz ki pa dan son lentere i fer son figir konmsi zanfan ki’n fek fini anval kendrik. Tapaz lavwa Anzel ti envit osi plizyer dimoun pour get son spektak degradan.

Lo semen bann ki ti pe monte e desann ti arete pour ekoute ki pe pase. Bann vwazen e osi Edwar ti forse kit zot lokipasyon pour koste kot lakaz pour vwar ki pe arive.

Anndan dan salon trwa viktim pe plere avek tou zot kouraz. Zot in may kanmarad konmsi pti koulev dan lapo koko. Menm si sa dimoun ki Zozefin ti annan lanvi vwar boner prezan i la pa plis ki ven met avek li, sa kankan ki pe pase i anpes li sorti pour koz avek son mari. Tandiski pour bann veyer zaksyon sa i en lokazyon pour konn sekre ek defo kanmarad. Demen dan travay konversasyon pou pli gou, avek zot bout ki zot pou azoute.

Pour Edwar sa levennman pa fer li byen. I bezwen enterfer pour konnen ki pe pase.

“Anzel ki sa tapaz ki ou pe fer pour donn dimoun lokipasyon?” i demande.

“Pa konsern ou. Ou fer ou louvraz. Mon piti mwan ki’n soufer pour met ater. Ou vey ou zaksyon,” Anzel i reponn.

“Les li koze Msye Edwar. Kekfwa in santi en bezwen pour dir sa ki i pe dir,” Edme i dir.

“Pa ou zafer ou osi. Bwar ou baka e pase al se ou. Ase mel dan sa ki pa konsern ou,” Edwar i reponn.

Tou kanmi kanmi, Edme i glis par deryer e disparet. I konnen ki kan grannwar pe koz koumsa keksoz pa pou mars tro byen. Me Remon sa sirpriz pa’n fer li byen. I debout tou dekouraze avek son lanmen deryer son latet, me en lensidan tousan i redonn li kouraz.

Laport salon i ouver e en zennzan dis an i sorti an dizan, “Pa tous mon papa. Les li tranquil.”

Me Zan pa ganny letan ariv kot son papa ti pe debout pour donn li plis sipor. Anzel i atrap li e flank li de bon kalot lo son deryer e fou li dan lavarang kot i tonm ater e tap son latet avek laport. Sa enn ti en pe tro pour Remon kapab siporte. Avek en vites i fons lo son belmer an demandan, “Ki sa ou pou touy li?” Me Edwar pa les li koste Anzel an separan zot avan zot koste kanmarad. En larm trannsenk an i fors son semen ant sil lizye Remon pour mouy son figir. Laraz i trouble son lespri, en laraz ki pa’n zanmen paret devan person. Remon in touzour en zonn tranquil pour tou dimoun ki konn li, me ozordi zot in war en sekre, i’n prouve ki delo tranquil i profon.

Avek en sel kou-d-pwen i kas en pye bannann sen zak an de. Pour bann ki ti pe fer sir ki zot pa mank naryen dan sa ki pe pase, sa moman in sok zot e zot ti kil kil en pe pli lwen. Kot leker Edwar i pas en lafreser terib kan Remon i ganny laplodisman son garson, ki dir an pleran, “Touy zot papa.” Lavwa Zan i fer Zozefin sorti dan lakaz e vin deor.

“Remon pa lager, les zot,” Zozefin i dir.

“Zozefin annou monte,” Remon i kriye.

Me Anzel pa donn zot sans koz plis ki sa. Li osi sa kou-d-pwen in koup son tiraz. Avek en lavwa pli dousman i dir avek Zozefin, "Pas kot ou ti ete. Ou pa lisyen pour sis pikan ou kanmarad."

Me sa i donn Edwar en pli bon zimaz pour mazine ki pe pase. I deside ganny en koze avek en dimoun ki i sipe i konn plis ki li e osi met son zann lape. I koste Remon. Avan i ariv tro pre avek li i fer sir ki zot konpran kanmarad.

"Remon mwan Padwar ki pe koz avek ou mon piti, ekoute. Pez en pe ou karakter e annou koz en pe. Mwan mon pa konnen ki zot in gannyen zot de Zozefin me mon konnen ki mon pa devret mel dan lavi maryaz mon piti otan ki zot pa pe touy kanmarad.

"Mon pli pa konnen ki ou mwan osi Padwar," Remon i reponn. Pour plis lenformasyon Edwar i demann Flosi ki prezan li osi i'n koste en pe pli pre avek Remon.

"Flosi sey rakont nou ki'n pase ki Zozefin in desann isi. Kekfwa ou konn en pe plis."

"Papa mwan osi mon pa konnen akòz Zozefin in desann avek son piti ek son bann lenz, me byen granmaten mon'n war Edme vin zwenn Manman e zot in koz an parabol pour mwan pa konpran. Mon'n tann Edme demann manman si i'n bliye ki zot ti pou al kekpar me mon pa'n konpran kote. Mon annan en for lide ki zot in al kot Zozefin e zot in al fer kek kankan laba," Flosi i eksplike.

"Anzel mon'n fatigue dir li ki sa Edme pou fer li ganny son lanmor en zour. Zanmen ou pa tann Anzel ek Edme dan en kankan. Oli li sa Edme la?" Edwar i demande,

"Mon pa konnen kot i ete. Konman kankan in leve mon'n war li disparet," Flosi i reponn.

"Ki mon'n fer zot Sennyer? Ki mon'n fer sa zans? Remon i siplye.

"Mon piti pran kouraz e mont kot ou pour evit diskisyon. Mwan mon a rode ki pe pase. Mon pa pou zanmen soutir ou fanm kot mwan. Zot devret kapab pran zot desizyon zot menm kan zot in marye," Edwar i dir.

"Wi Remon monte mon frer. Manman pa konpran ler i'n bwar en pe," Flosi i dir.

"Zot bwar espre pour fatig lavi zot kanmarad?" Remon i demande.

"Mwan mon krwar ki Edme ki'n envant kek rimer e i'n rakont Manman pour fer diskisyon, pa lot dimoun, parski mon'n tann Manman nonm Monik taler," Flosi i dir.

"Me ki Monik i pe dir mon anmenn kot mwan?" Remon i demande.

"Sanmenm sa ki mon pe mazine. I kapab Edme in dir Manman ki ou galan avek Monik ki travay avek nou lo laferm," Flosi i sipoze.

"Me fodre sa fanm i en kriminel Sennyer. Konman i a kapab fer sa?" Remon i demande.

"Ou pa pou zanmen konnen, parski sa bann vye fanm konmela zot polison kan zot sou. Zot oule fer sa ki zenn fanm i fer. Alor kan zot pa kapab zot envant tou kalite keksoz pour fer zot kanmarad ditor," Edwar i dir.

"Be bon, mon a mont kot mwan." Avek en lapenn an sakouyan son latet Remon i dir.

"Wi mon piti monte Padwar ava aranz tou keksoz. Pa trakase," Edwar i promet.

Edwar ek Flosi zot kondir Remon ziska dan semen e zot les li monte. Apre zot retourn kot zot. Bann veyer zaksyon ti'n fini disperse konman kankan in bref. Zis enn de vwazen ki ankor pe

vir vire parey mous zonn ki zot lakaz fek kase, pour gete si pa ariv plis keksoz. Li Anzel konman in bos Zozefin dan lakaz i pa'n sorti ankor. Sa premye leksperyans karakter son zann in vreman met li dan son plas. Zis i'n gronny gronny avek Zozefin anndan me pa for pour lezot tande.

Malgre tou Zozefin pa krwar ki son mari in tronp li me i napa en desizyon fiks pour le moman. Menm si i oule mont kot li son manman pa pou les li. Li i ti a'n voudre ganny en mo dan labous Remon e osi rakont li ki'n arive. Son manman pa'n donn li sa sans e i'n menm dir li ki i pa pou met son lipye deor tan ki Remon i la kot lakaz. Alor i kontinyen plere ek son de piti.

Edwar i koste Anzel kot i pe asize lo peron lakwizin e demann li, "Ki'n arive ant Zozefin ek son mari ki ou'n al sers li ek son piti ou'n anmenn isi e ou pa oule i koz avek son mari?"

"Edwar mon piti pour mwan, mon pa pou les zonn fer li soufer."

"Sa ki dir ou zonn pe fer li soufer?"

"Sa ki'n dir mwan pa konsern person."

"Bon. Ou kapab dir mwan ki mizer Zozefin i pase?"

"Msiye Edwar donn mwan en lape. Remon fek pous ou piti dan travay, ki ou pe pran son zentere?"

"Flosi ek Remon zot byen avek kanmarad. Se ou ki annan problem avek ou," Edwar i dir.

"Ou oule dir mwan ki Bib i lalang?"

"Alors sa ki ou pe fer. Ou pe konmans ankor avek ou manni rod dibwa pour fer kankan partou kot dimoun. Be mon ser la mon dir ou depi ozordi mon pa oule Edme i met son lipye devan mon laport," Edwar i dir.

"Ou dir sa ki ou anvi. Mwan mon pou touzour byen avek Edme, parski sa fanm zanmen i refiz mwan en servis."

"Ki servis Edme i rann ou? I donn ou fo nouvel pour ganny bwar e fer kankan se tou."

"Ki kankan? Edme ki ti fer konmeraz Remon ek Monik? I'n trouve i'n rakont mwan. Si i pa ti'n war, i pa ti a rakonte."

"Sa Edme ki ou pa oule depler li, ou a trouve kot i pou anmenn ou en zour," Edwar i dir.

"Sa i konsern mwan. Vey ou ek serzan." Edwar pa antren Anzel plis ki sa. I pran son larozwar e al fini aroze dan zarden e Anzel i kontinyen vann son baka avek bann ki ti ankor pe espere danmzann vid.

Sa lensidan in anmenn en benediksyon pour Flosi. Pandan letan ki son papa ek manman ti pe diskite, li i ti pe ekout zot e sey evalye sityasyon. I'n dekouver ki lakoz tou sa kankan i pirman rimer ek siperstisyon. I'n osi santi ki en fanm ki bwar napa respe pour lavi lezot dimoun e zot kapab fer krim pour naryen ditou. I'n evalye menm son manman kan son papa pe sey koz avek li pour person pa tande me li i fer plis tapaz. Konportman son manman in vreman degradan e ensiportab pour li. Li ki konn tre byen ki Remon pa en zonn ki pou tronp son fanm ek en pti bordel konman Monik. Li i'n menm parfwa pran Remon pour en boufon.

Tou sa bann vilen lensidan i donn li en lot lespri, en lot fason rezonnen e i deside ki i pa pou gout okenn lalkol depi ozordi. Ti annan en lanmok plen avek lapire obor li, i fou en kou-d-pye sa lanmok avek tou son materyo ladan, ki roule dan lari.

"Ki sa ou osi ou'n tro granfanm? Ou oule dekok mon lanmok?" Anzel i demann li. Me Flosi pa reponn. I devire e antre anndan kot son ser.

Pov Remon, i ariv kot li tou dekouraze e tou kagou. Son lisyen

ti pe esper li avek pasyans. I asiz dan sez kot rimer ti'n fek separ son fanmiy dan en gran mazinasyon. I santi li pe fer fas avek en dezespwar terib. San okenn problem in perdi son fanm ek son de piti. Ki pou arive avek son lavi?

Sa lafors ki i ti'n gannyen taler in fini kit li. Laklos legliz i sonn sis er pour endike ki lannwit in konmans anglouti later e sa ler kot sekre fanm ek zonm i sorti pe arive. Sa swadizan ler ki li ek son fanm ti abitye partaz lanmour avek zot zanfan in arive me ozordi i pe partaz en leksperyans lapenn litousel. Ki pe arive avek bann plant dan zarden pa enteres li e kwi manze osi pa son zafer. Son sel zanmi i Venker ki asize ant son lazanm pe fikse drwat dan son figir, konmsi pe poz li kestyon. Konmsi Venker i anvi demann li oli larestan dimoun ozordi. Tanzantan i sakouy son latet ek son gro lake e get direksyon dan semen, apre reget Remon an tiran son lalang. Me son met pa konpran ki i anvi dir ouswa demande. De trwa sopin labyer vid ki Zozefin ti'n met an ta anba pye zavoka dan lari i fer Remon rapel ki i ti'n anmenn de labyer dan son sak kan i ti monte boner.

"Akoz ou pa bwar ou de labyer e repoz ou latet?" En lide i pas dan son latet.

"Zisteman, napa lot keksoz pour fer."

Remon i leve e antre anndan. I'n bliye met son labyer dan frizider e tou le de in so. Li labyer so pa son zafer. I ouver frizider pour met son de labyer fre. La en lot tantasyon i atak li. I dekouver ki ti napa zis de labyer me ankor sis byen fre ki ti la depi Dimans pase. Sa Marsel ki ti'n anmenn pour li kan i ti vin rod baton mayok sengapour e i pa ti'n bwar paske zanmen i oule bwar plis ki de labyer dan Dimans. Kan Marsel ti arive i ti'n fini son tarif depi apre dezennen. Osi la dan laport frizider i annan sa trwa kar boutey zin ki par fot son fanm in mete. Pa zot labitid met bwar for dan frizider. I fer sir ki zin menm ki dan sa boutey. I debouse

e santi apre i poz lo latab. I ouver lot konpartiman e i pran dekwa laglas pour de bon grog i met dan en ver e poz lo latab osi.

"Non," i dir dan limenm, "mon a konmans avek en pti labyer avan." I reouver kot labyer i ete, pran enn i debouse e asiz atab pour swadizan konmans fann son traka.

Labyer i fini, traka i konmans fann avek zin. Ale zin ale Remon. Olye de grog, boutey i vid e bann labyer i sorti enn deryer lot dan frizider. Soulezon i plonz son latet fatigue dan en gran sonmey apre ki i'n bwar kat labyer.

Granmersi Venker pa en lisyen ki kontan marsaye devan laport dimoun. Menm si son met in kit laport ouver, personn pa pou rantre. Avek son lestoman vid i'n tonm lanmenm devan lo pa-d-port pe vey lakaz.

En divan senk er bomaten i fors Remon dres son latet lo latab. "Ar...." i fer en gran baye. I redi redi en pe son lebra ek lazanm e dres debout.

"Be kisennla ki'n ouver sa laport?" i dir litousel.

Apre i mazine ki limenm ki pa'n ferm laport yer swar. I remarke ki bann sopin labyer vid, sa boutey zin vid ek ver, tou i ankor la devan li lo latab kot i'n pas son lannwit. Devan laport Venker in alonze apre sa long lannwit travay san manze.

I zet en regar partou dan lasanm pour fer sir ki personn pa'n retournen pandan ki i ti pe dormi, me i pa ti war personn. Yer swar i'n fer son premye leksperyans separasyon ki'n fini anba lenflians lalkol e ozordi son lekor i tou kraz kraze. Son latet i vid, i lafen, i fay, konmsi i'n ganny bate dan son sonmey.

I alim stov e met boulwar pour fer son dite. Erezman lapli in

tonbe. I pa pou bezwen aroz zarden avan i al travay. Apre ki i'n pran en bon ben, i fer en bon lanmok dite byen so pour fann sa lefe bwar dan son lekor. Laklos legliz i rapel li ki son ler desann in arive.

I pran son sak pour desann, me Venker pa dakor avek sa kondisyon travay san manze. O moman Remon pe ferm laport i fer li rapel ki en lisyen pa reste vant vid an zapan de fwa.

"Woup, woup."

"Mon zanmi, mon pe bliy ou," Remon i dir son lisyen. I reantre anndan i pas diber lo en morso dipen e donn son lisyen. La i ti kapab ferm laport e desann. Bon nouvel touzour frer torti-d-ter ki fannen me move nouvel, frer seval i touzour fer sir ki i pa dormi avek.

Anba pye mang dofinen kot biro Ans Lanmous avan lapel, tou travayer pe asize sakenn pe rakont sa ki zot in tande, ouswa fer en pti fars pour esper set er sonnen pour zot konmans sa zournen.

En kou an gran en nouvel i atir plis latansyon tou bann ki ti la. En zournalis pli popiler parmi bann fanm i demande, "Zot in tande kankan ki'n pase yer kot Edwar?"

"Zot Flosi ankor? Pa dir mwan," en lot i dir.

"Pa Flosi, ou bourzwa ek son belmer," Edme i eksplike.

"Ar me dir nou lekel. Ki ou pe tatonnen?" En zonm safwasi i dir avek lenpasyans.

"Remon ek Anzel, zot in fer en gro kankan ki tou dimoun in bezwen sorti kot zot pour vin gete." Edme i eksplike.

"Zot, degre zot ti byen? Ki zot in gannyen ankor?" Alfred i demande.

Alfred enn pli vye travayer parmi bann zonm ki travay lo sa laferm. Li personn pa pou rakont li zistwar laferm Ans Lanmous, parske tou son zenntan i'n pas la. I ti travay avek ansyen

propriyeter sa later Msye Bole depi ankor zanfan ek son papa, Msye Zedeon ki'n mor trant an pase. Apre lanmor son papa, Msye Bole ti met li gardyen sa propriyete ziska Gouvernman ti deside aste sa later dis an pase pour devlope. Li i'n kontinyen travay avek leta ziske konmela. Pour li, travay lazournen pa en gran zafer. I zis balye balye e vir vire ziska trwa er ler li antre kot li, dan en pti lakaz lanmenm pre avek biro. Lannen prosenn i pou ganny son laz sekirite e i a tous son 1000 li osi parey son bonnfanm Ninan ki dan son dezyenm lannen sekirite sosyal.

"Mon krwar kankan in leve kan Remon in vin rod son fanm kot Anzel," Edme i dir.

"Fanm, ki fanm?" Alfred i demann li.

"Mon krwar son fanm in kite avek li, parske i tro lavi."

"Lavi? Sa mon pa krwar Edme, ou a dir mwan pour en lot rezon."

"Pa met lanmen dan dife. Delo trankil i profon."

"Dir sa ki ou oule, me mwan mon pa pou zanmen krwar ki Remon i annan en lot fanm."

"Mwan mon pa konnen, me son belmer ki dir ki Remon i galan avek Monik e zot fer zot konmeraz isi dan biro," Edme i lav son lanmen.

"Lekel Monik ki avek Remon?" Monik ki ti asize parmi i demande.

"Ou menm ki'n dir mon ser," Edme i reponn.

"Dir sa vye soulez pa fer mwan mont kot li pour ensilte li anba son vye zip. Mwan mon pa menm konnen si Remon i en zonm ouswa pti garson. Dir li kan i fer son bann ensinifyan pa met mwan ladan," Monik i dir avek en lakoler.

"Edme me ou pa dir li naryen lo sa size?" Alfred i demande.

"Alfred mon frer, ou pa konn mwan avek sa pa kontan mel dan keksoz dimoun? Ki mon pou dir li? Kekfwa i asire.

Eksa mon ti pe sey met zot lape, me devan tou sa dimoun Bonm Edwar in fer mwan ganny gro latet pti likou. Mon ti kit zot andoubankat e mon ti al se mwan,” Edme i reponn.

“En lakizasyon parey i plis ki en krim sa. Remon i annan toutafe rezon si i’n fer kankan parey ou pe dir,” Alfred i dir.

“Zot arete. La son piti i vini, taler a lev en lot kankan,” Edme i dir.

“Pa en lot kankan. Ler Remon i arive mon pou demann li sa parol,” Monik i dir.

“Non mon piti pa neser fer en lot diskisyon. Petet son latet i fatigue. Pa fer li pran en lot lakoler,” Alfred i reprimann Monik.

“Ton Alfred, menm ou ou pa ti pou kontan si en dimoun i fer en tel akizasyon parey lo ou.”

“Mon konpran mon ser. Me mazine ki lefe sa kestyon i kapab fer lo en zonn latet fatigue.”

“Zot arete mon dir zot, Flosi pe vini,” Edme i repete.

“Konmsi zis mwan ki zot in war pour met dan zot kankan. Ki sa mon ledi i pli larz ki pour zot tou isi?” Monik i dir an pleran.

En soufflet byen for i souffle par bann lanm louverz biro ki endik bann travayer ki ler travay in sonnen e fodre zot koste kot biro pour reponn lapel.

Ozordi set er in sonnen e Remon pa ankore ariv dan son biro, alor son asistan i fer lapel dan son plas. Li Marsel depi sis er in arive. Parey son labitid i’n pas en pe partou pour fer sir ki tou keksoz i byen apre i’n antre dan biro. Menm si Flosi in vini zot pa’n koz avek kanmarad parski zot pa tro tro manz disel, me lefe ki liv prezans ti lo biro Remon, i’n fors zot ganny en premye kontak sa lazournen. Kan Marsel i antre pour pran liv i dir bonzour Flosi e i reponn avek en zoli pti souriy.

Zot pa koz plis ki sa. Marsel i sorti vit pour al asiz anba lavarang biro atab pour kriy non bann travayer enn apre lot.

Marsel i fini fer lapel, i plas bann dimoun dan zot travay apre i antre pour met liv lo latab Remon.

Flosi i pran sa lokazyon pour rearanz son relasyon avek li. Avek en santiman tousan i dir, “Marsel mon demann ou leskiz pour tou sa ki’n arive ant nou dan lepase. Mon espere ki nou a kapab travay pli byen aprezan.”

“Flosi sa ki’n pase in fini, nou pa bezwen retourn lo la parey zannan. Mwan mon’n touzour anvi travay byen ansanm konman vre zanmi, me i vre ki parfwa ou konportman ti gat nou relasyon e mwan osi mon oule demann ou leskiz. Mon espere ki nou pa pou repet sa bann move keksoz ankore,” Marsel i dir.

“Marsel ou’n vreman soulaz mwan avek sa parol. Mon rekonnèt ki mwan lafot tou sa problem ki nou’n gannye dan lepase e mon vreman regrete.”

“Mon dakor me mwan osi mon ti kapab evite dan plizyèr sans e mon pa ti fer li, alor mwan osi mon santi mwan koupab.”

“Marsel ou vreman spesyal parmi bann zenn ki mon’n deza tenir en bon konversasyon avek.”

“Mersi, me fodre dir osi ki dan bann fiy ou pa mal ou osi.”

“Mon krwar sa fason ki mon ti pe anmèn mon lavi in vreman gat mon repitasyon ek mon sans viv konman en zenn fiy, me mon’n deside refer mon lavi konpletman.”

“Sa en bon lide mon ser.”

“Depi yer mon’n realize ki lalkol i gat en kantite bon keksoz dan lavi en dimoun ki mal servi li e mwan mon’n ganny repinyans bwat, apre ki mon’n temwannay lensidan ki’n arive yer.”

“Zot felisitasyon mon ser. Bondye a ed ou pour sanz ou lavi.”
“Get pov Remon ki’n arive avek li,” Flosi i dir.

“Remon? Me Remon pa en bwat li. Ki’n arive avek li?” Marsel i demande.

“Pa Remon ki’n bwar me mon manman zot de Edme. Apre ki nou ti pe tap enn de lanmok yer bomaten zot in kit mwan avek lakaz e zot in al kot Remon. Mon pa konnen ki rimer zot ti’n envante pour zot al dir Zozefin, me pli tar zot in desann avek li ek son piti dan lakour. Kan Remon ti vin rod son fanm pli tar, manman in fer en pake diskisyon avek li, i pa’n oule Zozefin koz avek Remon e i’n dir ki Remon i galan avek Monik.

“Monik ki travay isi la?” Marsel i demande.

“Wi limenm.”

“Non, mon pa krwar. Ou manman i en fanm atoufer si i dir sa.” “Marsel Manman pa konn Monik. I bezwen en dimoun ki travay isi ki’n envant sa rimer e mon annan en for dout ki Edme ki’n kas sa dan son latet.”

“Zot ou a dir i a fer sa avek Remon?”

“I bezwen limenm pa lot dimoun.” Zot pa ganny letan fini zot konversasyon. Zot tann en dimoun dan direksyon laport. Zot aret sa konversasyon pour esper sa dimoun antre. Sa ki aparet devan laport i fer disparet zot lenkyetid.

“Alo, alo konman zot sava?” Olye reponn kestyon, Marsel ek Flosi i poz menm kestyon ansanm.

“Oumenm konman ou sava?”

“Mon byen me mon’n ganny en pti retar bomaten avek sa pti lapli,” Remon i eksplike e asiz kot son biro.

Menm si Remon pe zwe byen, son laparans i dezaprouv sa ki son labous i dir. I pa ti sa Remon ki Marsel i abitye travay avek tou le zour. Lo li i annan en triko ver ki i’n met devan deryer san ki i’n apersevwar e son de kanmarad i remarke. Pa li sa Remon ki ariv dan travay an retar. Pa li sa Remon ki zanmen mank en souriy lo son figir. Pa li sa Remon ki pa fer en fars pour fer riye tou le bomaten. Sa enn en Remon ki annan en keksoz pe fatig li. Kot i asize lo son biro pe tyek prezans bann travayer dan liv ki

Marsel fet mete de trwa minit pase, i annan en portre son garson drwat devan li. Sa pti garson ki an grandisan pe pli resanble son papa i enteronp son konsantrasyon e fors li pran en gran lespirasyon. Apre i fikse son regar lo sa portre pour en pe letan.

“Ki’n arive zonm? Konmsi ou pa normal,” Marsel i demande.

“Non, mon pe fer rezon mon frer,” i reponn.

“Be konmsi triko i devan deryer non?” Flosi i demande.

“Zot ou konnen vre mon’n met sa triko devan deryer, mon Dye.”

“Mon’n fini donn travay bann dimoun me si ou annan lezot travay ki ou ti a kontan fer, apre ou a dir mwan,” Marsel i dir.

“Non Marsel i O.K., okontrer mersi.”

Menm si i remarke ki son zanmi napa en bon konsantrasyon, Marsel i kit li avek Flosi e al get bann travayer deur. Remon i profite pour pran en pe lanket lo son fanmiy.

“Flosi konman sava mon ser, rakonte?”

“Mon byen Remon. Ou menm kimannyer ou’n pas lannwit yer swar?”

“Ase byen, me mon ankor pa konpran pour ki rezon Zozefin in kit mwan.”

“Remon mwan osi mon pa konnen me mon konnen ki ou fanm pou retourn kot ou.”

“Wi me en vilen tras in fini aparet dan nou lavi e nou zanfan in deza manz sa merkir ki nou pa ti oule donn zot,” Remon i eksplike.

“Remon pa ni ou ni Zozefin ki koupab pour sa. Mon konnen ki i annan kek dimoun ki’n sey anbet Zozefin pour sorti kot ou.”

“Me aköz en dimoun a fer sa avek mwan Flosi? Mon pa fer personn naryen mwan.”

“Ou pli gran ki mwan, me les mwan dir ou ki konmela pa fodre

ou fer en dimoun keksoz pour li fer ou dimal. Okontrer bann ki ou fer dibyen ki pli souvan sey fer tou sa ki zot kapab pour rann ou lavi malere.”

“Mon pa pou dir non Flosi, me mon war drol akòz Madanm Edwar san en rezon in azir parey yer swar anver mwan.”

“Remon mon konnen ou pa pou fer plis kankan ki sa pour met mwan an kontrayete dan lakour. Les mwan rakont ou en pe sa ki mon doute. Mon annan en for dout ki Edme i koupab pour sa ki’n arive,” Flosi i dir

“Ar non Flosi, pa mazin sa.” Remon i met odefi.

“Pa met lanmen dan dife pour en dimoun ki pe ri avek ou tou le zour, lisyen i mord son met.”

“Wi, mon konnen, me en vye fanm parey Edme pa pou fer sa avek mwan. Ki i pou gannyen?”

“Akoz ou pe persiste? Les mwan rakont ou ki ti arive yer bomaten. Yer Edme pa ti vin travay, sa ou rapel?”

“Wi, yer i pa ti vini.”

“Be yer granmaten i ti’n ariv dan lakour pe rod Manman e manman pa ti ankò leve.

Mon ti tann zot pe mangonnen zot de papa deor e mon’n sorti parske mon konnen zot pa tro manz disel. Kan mon’n sot deor papa in kit li avek mwan e i’n demann mwan baka. Mon’n rod sakenn en lanmok e nou’n asiz lo peron. En moman apre Manman osi in leve e tonm dan ta. Mon’n tann li demann Manman si zot pa pou al kot zot ti dir yer, sa i oule dir avan yer. Ti paret ki Manman ti’n bliye me i ti persiste e fer Manman rapel en pe a lekar pour mwan pa tandè ki zot pe koze. Apre sa zot in ale e ler zot ti retournen zot ti vin avek Zozefin ek Marta. Mon ti war Zozefin pe plere. Menm si mon’n sey demann li ki’n arive i pa’n oule koze,” Flosi i rakonte.

“Me Padwar pa dir naryen ou manman?” Remon i demande.

“Apre ki ou’n ale papa in anponny li deor kot lakwizin. Papa pa pou zanmen toler li fer sa kalite ensinifyan e sepa si Edme a pas ankò dan lakour ler Papa i la,” Flosi i reponn.

“Mon pa konpran kimannyer en dimoun i kapab fer en keksoz parey avek son prosen Flosi.”

“Remon ou pa pou zanmen fini konpran en dimoun. Mwan sa ki zot in fer ou i vreman fermal pour mwan. Mon konnen ki ou osi ou santi menm plis ki sa. Me sa in ed mwan pour deside sanz mon lavi e fer mwan degout bwat akòz mon’n remarke ki pour en pe larak e anba lenfliyans lalkol en dimoun i kapab fer bann ki viv otour li soufer e menm son prop lekor.”

“Si ou’n war sa, i bon pour ou Flosi, me mwan ki mon pou fer san mon fanmiy?” Remon i demande.

“Pa trakase mon frer, ou fanm pou retourn kot ou. Mon asire papa pa pou les sa fini koumsa, parske menm manman in al sers Zozefin kot ou i napa plas pour met zot dormi e ni Zozefin pa pou kapab sipòrt sa lavi ki egziste dan lakour. Me se Manman ki pe persiste pour anpes li koz avek ou.”

“Ou manman pa kapab fer son desizyon Flosi. Zozefin i en gran fanm, i bezwen konnen ki i pe fer.”

“Mon toutafe dakor avek ou Remon, me les mwan dir ou ki Zozefin pa kapab fer sa ki mwan mon fer. I’n touzour les Manman desid tou pour li e Manman i met li anba presyon fasilman.”

“Dakor, son manman i met li anba presyon e i fer mwan ek nou piti soufer? I pa realize ki i’n marye? I pa mazin ki nou annan en lakaz ek zannimo pour okipe? I pa realize ki pou arive avek tou sa viv ki nou’n plante kot lakour? Dir mwan ou pa i war ki sa i en pe tro pour sipòrte?”

“Mon krwar ou annan rezon Remon, me pa tro fatig ou latet, mon a ed ou kot mon kapab,” Flosi i promet.

“Mersi Flosi me i pa fasil pour en lot fanm ranplas Zozefin dan mon lavi.”

“Mon pa pou ranplas Zozefin me mon a ed ou avek bann louvraz ki en fanm i fer kot en lakour e donn ou en pe sipor moral parey ou’n touzour ed mwan dan travay.”

“Flosi kan mon ed en dimoun mon pa ekspekte li rann mwan naryen an retour me si ou ofer mwan ou led mon a dir ou mersi.”

“O.K. mon frer, kont lo mwan.”

Sa lensidan byensir pa fatig zis Remon ek Zozefin me osi zot zanfan. Dan lekòl ansennyan i remarke ki enn son etidyan pli aktif pa pe konport li parey son labitid. Bomaten i’n ariv dis minit apre ki leson in konmanse. Ansennyan pa’n antren li pour sa premye fwa me pli tar i remarke ki Zan pa pe konsantre dan leson e i pe plere. Menm ki i’n sey koste Zan pour konnen ki sa ki pe anpes li etidye, i pa kapab tir en mo dan labous sa garson. Pourtan Zan i en zelev ki pa timid ditou e zanmen son ansennyan in bezwen pran roten avek li.

Ozordi en parol pa sorti dan son labous, zis larm dan son lizye ki pe mouy son kaye. Son douler i met son laklas antye dan en gran silans e tou son pti zanmi pe fikse li e sey doute ki’n kapab ariv li.

“Zan ou pa pou kapab anpes tou ou bann kanmarad aprann mon garson, ouswa ou dir mwan ki ou gannye, ouswa ou sorti deor e les lezot kontinyen aprann,” Mis i dir. Zan i leve i sorti deor. I asiz ater anba lavarang lekòl drwat devan laport e kontinyen plere avek son latet bese ant son de lazanm. Safwasi i pli pir ki dan laklas, konmsi mis ti’n bat li, i pler pli for.

“Be mon garson ou pa pou anpes mwan travay, leve e al en lot landrwa,” mis i dir an aprosan Zan e atrap son lebra pour met li debout. Zan i may lazanm son ansennyan e koste avek son

lestoman an dizan, “Mis mon oule war mon papa.”

Sa premye parol ki Zan i dir son ansennyan ozordi i konman en dart vyolan ki anfonse dan leker sa zenn fanm. Akòz Zan i oule war son papa ozordi, i en mister pour li. Touzour Zan ti rakont li sa ki zot ti fer an fanmiy e felisit son papa ek manman.

“Akòz ou pous mwan ou osi parey Granmanman?” Zan i demann ankor an pleran.

Sa lanmour dinanmik ki egziste ant en ansennyan ek son etidyan i fors larm sorti ant sil lizye e mark de tras delo lo lazou sa zenn fanm. Menm ki i pa ankor konn rezon ki Zan pe plere i partaz sa soufrans li osi. I bliye pour fer atansyon ki i ti a sali son zoli zip pli kouler gri avek later anba lavarang ki marmay ti’n mete avek zot savat an antran dan laklas. I tonm asize akote Zan li osi an dizan, “Pa plere mon boy dir mis kote papa in ale.”

“Mon pa konnen kote i’n ale, zot in lager avek li yer. Mon oule al kot mon papa mwan mis,” Zan i dir an risan son pti leker.

“Kisennla ki’n lager avek li? Dir mis.” Mis i demande.

“Bann dimoun kot Granmanman,” Zan in reponn.

“Oli ou manman? I kot papa?” Mis i demande.

“Non mis, Granmanman pa oule nou al kot nou.”

“Bon mon boy, aret plere mis a fer apel Papa pour vin get ou.” Mis i met Zan dan laklas e i diriz kot kordinater. Petet i a ganny en solisyon pour problem Zan. I pa pou kapab les en zanfan soufer san fer keksoz. I antre dan biro kordinater avek son de larm pe koule.

“Ki’n arive mis Akous?” kordinater i demande.

“Msye Adriyen i annan en problem grav avek enn mon etidyan dan mon laklas,” Mis i reponn.

“A mon ti krwar ou ki annan problem mwan.”

“Msye Adriyen, problem mon etidyan i mon problem.”

“O.K., ki’n arive?”

“Mon pa tro konnen me i pe plere e i dir ki i oule war son papa.”
“A mon ti krwar en problemn,” Msye Adriyen i reponn.

“Non, ou pa ankor konpran mwan byen. I’n dir mwan ki son manman pe reste kot son granmanman e son granmanman in lager avek son papa yer. I paret ki en diskisyon in leve ant son fanmiy e sa pe fatig li.” Mis i eksplike.

“Lekel sa etidyan?”

“Zan Marimba, sa pti garson aktif ki nou touzour koz lo li,”
Mis i reponn.

“Son granmanman sa fanm soulez ki zanmen pa avek en sopin gines?”

“Wi limenm mon krwar.”

“A sa les zot demerd zot, pa sey mel ou ladan.”

“Msye Adriyen mon pa ekspekte ou rann mwan en repons parey. Son granmanman ki en soular, pa son manman ek son papa ni li nonpli. Ou bezwen fer en keksoz pour li omwen,” Mis i persiste.

“Mis Akous les mwan fer en keksoz byen kler avek ou. Isi dan sa lekoul ou en ansennyan. Ou responsabilite i pour enstrir, pa pour rezourd bann problemn sosyal etidyan, ou konpran mwan byen?” Msye Adriyen i eksplike.

“Msye Adriyen, Zan i enn mon pli bon zelev e mon santi son soufrans plis ki konsern mwan.”

“Gete manmzel, mon repete, ou pa en travayer sosyal e ni en zofisye lapolis. Al fer ou travay les mwan fer sa ki pour mwan. Si sa garson i anbaras ou fer li al kot li.” Sa desizyon pa satisfè Mis Akous me i’n sey fer son mye pour le moman. An pleran i sorti dan biro kordinater e diriz ver son laklas. Non, i pa pou anvoy Zan kot li. I pa kapab fer sa avek en zanfàn, sirtou Zan son etidyan prefere. Li osi in deza zanfàn e i’n annan zanfàn. I pa pou kontan si en zour dimoun i abandonn son piti dan en ka parey, me

dan le moman i napa en lot solisyon. Dan laklas antye sa gran silans i touzour egziste. Mis i asize lo sez devan son latab e bann dalon Zan pe sey konsol li.

Sa lazournen i pas vit. De er edmi i sonnen, ler ki tou etidyan i retourn dan lakour. Pour Zan ozordi sa moman pa eksitan. Napa naryen pour li prese e antre dan en lakour kot i pa menm anvi ale. I debout dan lakour lekoul avek son sak dan son lanmen e pe manz zong son lot kote lanmen konmsi en zanfàn ki’n perdi larzan konmisyon son paran.

Son laparans pa fer plezir kordinater. Fodre i mont kot li kan lekoul in large.

“E, mont kot ou. Ki ou pe vir vire konmsi poul ki’n perdi nik?”
Msye Adriyen i demann li. Olye reponn, Zan i rekonmans plere.

“Ki ou gannyen? Ekoute mon a donn ou roten e fer ou gel plis.” Msye Adriyen i antre dan biro pour al sers son roten moris. Dan laplenn Zan i kontinyen plere, en leokri ki atir latansyon Mis Akous ki ti ankor dan laklas pe prepar li pour sot lo koltar. I ti mazinen ki Zan in fini al kot li, me sa lavwa ki ti bles son leker bomaten i endik li ki son panse i fo. Sa lavwa i bezwen son sekour. I pran son sak i sot deor vitman e la kordinater ti’n preske koste Zan avek son roten pour ogmant son soufrans.

“Pa tous sa piti Msye Adriyen, les mwan koz avek li,” Mis Akous i kriye a otvwa.

“Zanfàn dezobeisan i merit ganny korize. Ki ou pe mel ladan ou?” Adriyen i demande.

“Mon bezwen mel dan zafer mon etidyan. Mon pa kapab les en dimoun abiz lo son soufrans. Mwan osi mon’n deza zanfàn e mon annan piti sa laz. Mon pa pou kontan si kot zot lekoul zot ganny abandonnen parey ou krwar nou devret abandonn Zan.”

“Ou annan rezon mon ser,” de trwa lavwa i dir preski ansanm.

Sa bann lavwa i bann kanmarad ansennyan Mis Akous ki zot osi ti’n sorti pour donn zot lasistans sa etidyan dan son soufrans. Me son mis ti ariv kot li avan zot, pour anpes roten tous son lapo. Zot osi zot in ganny en pe lenformasyon avek Mis Akous dan ler dezennen. Zot in dekouver ki Zan pa tro byen e i paret trakase. Zot ti kestyonn Mis Akous e i ti’n rakont zot sa ki Zan ti’n dir li e osi latitid Msye Adriyen anver sa sityasyon. Sirman sa bann ansennyan pa’n dakor avek sa dezisyon Msye Adriyen konman en paran li osi.

Boner Msye Adriyen ti afront Mis Akous, me pa safwasi. Premye fwa depi i ansarz en lekol enn son ansennyan i azir parey anver li. I’n touzour mazine ki Mis Akous pa en ansennyan osi serye ki sa, e i ti a kapab dray li dan nenport fason ki i ti a anvi. I santi i litousel e tou lezot ansennyan i pour Zan, alor i pa pou kapab azir kont tou sa dimoun. Son lakanmizri pa permet li dir en mo. Zis i devire e mars dan direksyon son biro latet anba.

Mis Akous i deside mont avek Zan kot son granparan pour donn li sipor e petet laba i a ganny en pli bon portre lo sa ki’n ariv son etidyan.

Dousman zot ariv kot lakaz Edwar e Mis Akous i dir Zan apel son manman. Zan i mazin levennman ki ti pas yer e i konmans pler ankor. I mazin sa kalot an pousan ki i ti’n gannye avek son granmanman e sa laport ki la devan li, ki i ti tap son latet avek. I war sa pye bannann ki son papa ti kas an de pandan ki i ti pe soufer. Sa limazinasyon i zwe li ankor en fwa sa sware tris. I larg son sak ater e atrap son latet avek son de lanmen. I fikse son mis drwat dan lize e siply li, “Silvouple mis, mon pa oule al la

mwan. Anmenn mwan kot mon papa, i anvi war mwan.”

“Mon konnen mon boy me mis ti a kontan koz avek manman avan nou al kot papa,” Mis Akous i reponn.

“Granmanman pa pou les li vin kot ou parey i ti fer yer avek papa. Annou ale mon dir ou.”

“Bon, mis a sey kriy li, aret plere.”

“Madanm Remon, Madanm Remon,” Mis Akous i kriye. Me olye tann en lavwa fanm, en zonm ki reponn e sa lavwa i vin dan zot direksyon sortan kot lakwizin.

“I pe repoze. I annan konmisyon?”

“Non, me mon ti oule koz avek li personnelman, i byen enportan,” Mis Akous i reponn.

Edwar i aforsi lepa. I mazine ki petet en lot ensidan in kapab arrive, kan i apersewar Mis Akous ek Zan ki ankor pe plere. I demande, “Zot, ki’n arrive ankor? Mon boy ki ou gannye?”

“Pa’n ariv li naryen msye, me depi bomaten i pa paret byen. I’n plere preski lazournen antye e i demann pour war son papa.” “Mon konpran Manmzel. Les mwan apel son manman,” Edwar i dir.

Pandan sa letan Anzel pe dormi dan profon sonmey apre ki i’n antonn son lapire depi granmaten. Zozefin osi ti’n tonm lo en nat zot de Marta pour poz en pe son latet, me sa lavwa ti revey li. Letan son papa pe koze avek Mis Akous i’n leve pour war ki pe arrive. O moman Edwar i koste laport, Zozefin i ouver e sorti.

“Ou’n leve mon ser? Sa mis i oule koz avek ou.”

“Kisennla sa mis? Akfer mwan ankor?” Zozefin i demande.

“Sa ansennyan Zan, i annan keksoz pour dir ou.”

“Bonswar madanm.” Mis Akous i dir.

“Bonswar Mis,” Zozefin i reponn an aprosan Mis Akous ek Zan.

“Pa trakase napa gran keksoz, me Zan pa’n oule monte apre lekol e i pe dir ki i oule al kot son papa.”

“Zot mon pa konnen ki mon pou fer avek mon lavi. Sa bann problemn i fatig mwan,” Zozefin i dir.

“Madanm mon pa oule fatig ou, me mon pe fer sa pour Zan, aköz i paret ki i annan en keksoz ki pe fatig son pti lespri. Depi bomaten i pa’n konsantre dan laklas e sa pa son labitid. An plis i’n plere preske lazournen antye san dir ki i gannyen. Konman son ansennyan sa in osi fatig mwan.”

“Mis eskize si mon piti in fatig ou. Petet i mon lafot si tousala pe arive, me mon pa konnen ki nou pou fer,” Zozefin i reponn.

“Madanm me son papa kote i ete?”

“Mon krwar i pe travay Ans Lanmous.”

“Me tou le zour pa i al travay? Kwa ki pe fer Zan plere ozordi?”

“Manman in fer mwan kite avek li.”

“Ou manman i fer ou kite avek ou mari? Sa mon pa konpran kimannyer.”

“I dir mwan Remon i annan en lot fanm.”

“Be ou mari in pous ou kot li?”

“Non mon pa ankor koz avek li e i pa konnen aköz mon’n kit li.”

“Me kimannyer san en rezon ou kite avek li e ou fer ou zanfan soufer?”

“I’n vin rod mwan yer. Me manman pa ti oule mon koz avek li. Manman ti fer en pake kankan ziska i’n ankoler, i’n mont kot li.”

“Si mon byen konpran, li ki pou dir ou ki pou fer dan ou lavi maryaz?” Mis Akous i demande.

“Mon pa konpran kimannyer mon’n fer en tel betiz koumsa.” Zozefin i reponn.

“Byensir sa i en betiz ki pe afekte pa zis ou, me ou piti osi ki napa naryen pour fer avek sa kankan ant ou, ou mari ek ou

manman. Parfwa nou fer keksoz san kalkile ki nou fer soufer lezot ki viv avek nou e menm otour nou,” Mis Akous i fer remarke.

“Mis konmsi ou pe dir mwan ki annan tor pour sa ki’n arive?” Zozefin i demande.

“Mon pa pe akiz zis ou, me zot tou ki konsernen e mon pa’n vin la pour enterfer dan zot zafer. Mon’n vin dan lentere Zan, aköz mon santi ki i pe soufer par zot aksyon aköz i pa kapab pran en desizyon lo limenm.”

“Mis mwan mon pa’n zanmen fer mon zanfan soufer e mon napa sa lentansyon. Mon kontan tou le de mon piti e zot kontan mwan, me esey konpran ki i fermal ler ou kontan en zonm, e ou pe viv byen avek li san okenn problemn, en kou an gran ou tande ki i pe partaz son lanmour avek en lot fanm. Sa en keksoz ki plen fanm pa pou zanmen siporte.”

“Ekout mwan, madanm, ou pa kapab ekout zis sa ki ou manman i dir ou. Ou ti devret ganny en koze avek ou mari avan pran en tel desizyon. Parske konmela dimoun pa kontan kan en lot son kanmarad i viv byen. Zot fer tou sa ki zot kapab pour fer lezot soufer, pour zot ganny nouvel. Menm ou prop fanmiy pa kontan kan ou viv pli byen ki li,” Mis Akous i fer remarke.

“Zot pa dir mwan mon prop manman a fer sa avek mwan.”

Edwar pa ti’n al tro lwen avek sa de zenn fanm, i’n tann tou zot konversasyon. I remarke ki Mis Akous pe byen koze e bann leksplikasyon Zozefin in donn li en pli bon zimaz sa zafer. Li i tro konn Anzel kan i’n bwar, e si zot in zwenn ansanm zot de Edme pa koze, napa pwazon ki vo zot dan Be Lazar. Anba lenfliyans lalkol zot napa respe pour personni ni menm pour zot proplekor. La konman i’n remarke ki son fiy pe met tro konfyans dan sa ki son manman in dir li, i bezwen enterfer dan zot konversasyon.

“Mon piti ou manman pa en fanm ki ou kapab krwar sa ki i dir. I’n nepli parey avan konmela. Kan i bwar tou sa ki ariv dan son labous i dir, sirtou kan i’n tonm avek son serkordon. Zot a met dife dan zot prop lakaz. Ou ase gran pour war si ou mari i viv byen ouswa mal avek ou, si i senser ouswa non, e sa en desizyon ki ou ki bezwen pran. Pa les en dimoun ki pa kapab met lord kot li, vin dir ou ki pou fer kot ou,” Edwar i dir.

“Zisteman msye, sa i plis ki laverite,” Mis Akous i azoute. Apre, foudre pa ekspekte nou lavi pou san poursan dan lazwa, i annan botan ek movetan. Nou pe viv avek imen, e nou tou imen nou fer fot. Kan en keksoz parey i arive dan en lakour, pa zis separasyon ki en meyer solisyon. Fanm ek zonm i bezwen koze e rod en solisyon. Avan tou zot bezwen konnen si vre. Nou pa kapab akiz en dimoun san zize e konn laverite.”

“Zozefin pa fer ou lenbesil pour les ou zanfan soufer aköz konsey dimoun. Gete, la ou pe soufer e ou manman ki’n fer ou fer sa bann ensinifyan, i sou pe ronfle sonmey e manke son zanmi osi i dan lazwa. Pran ou piti mont kot ou mari,” Edwar i dir li.

“Wi Manman, annou monte, mon pa pou reste la mwan,” Zan i dir byen fer lapenn.

“Wi mon boy, nou pou al kot nou,” an mayan son piti Zozefin i rasir li.

“Wi mon piti pa les konsey dimoun gat ou lavenir. Profite konman ou manman pe dormi, pangar i a oule fer son sovaz ankor. Mon a donn ou koudmen anmenn ou pti bagaz,” son papa i dir.

“Bon, mersi Madanm Remon pour ou korperasyon. Mon espere ki tou a mars byen e Zan a vin leköl demen avek en lespri an pe,” Mis Akous i azoute.

“Mis mwan osi mon remersye ou pour ou bon konsey. Mon

espere ki Remon a sey konpran ki’n arive e aksepte ki mon reste ankor kot li,” Zozefin i dir.

“Mon ser pa trakase, Bondye a aranz tou pour ou.”

Apre sa dernyen konversasyon, Mis Akous i kit Zan avek son fanmiy e pran larout pour kot li.

San ki Anzel i tande, Zozefin i anmas tou sa ki i ti desann avek e i pran larout kot son lakaz li osi. Desann avek manman, mont avek papa, desann avek enn sou e mont avek enn azen.

Bann veyer zaksyon ki reste pre avek semen ki ti’n tann kankan ki Anzel ti’n fer yer, zot debout dan lari pour agrandi zot lanket. Pour zot konmsi en maryaz ki pe monte, me pour Zozefin i plis ki en laont. I rekonnet prezan ki i’n zis donn dimoun en vilen lokipasyon lo li ek son mari, par konsey son manman ek Edme.

Parey nou konnen, pa tou veyer zaksyon ki annan menm sertifika, touzour en bann zot annan plis lardyes, e zot, sa ki zot war e tande pa sifizan pour zot konplet zot nouvel. Zot bezwen rod plis an fezan bann demann endirek. Tel ki “Se zot i annan malad?” “Padwar ki sa divan ki pous ou dan leo ozordi?” Me ni Edwar, ni Zozefin pa reponn zot ni an byen, ni an mal. Pour fini kont, zot bezwen kit zot labous fermen e les zansla kontiny zot semen.

Dousman dousman zot ariv kot lakour e sa gardyen senser i la pour resevwar zot menm avek en pe mirmir avan les Edwar koste kot lakaz.

Pour Venker Edwar i en etranze. I pa pou les li koste lakaz fasilman menm ki i’n vin an byen. Venker in fer drwat bann pwal

lo son likou e partou lo ledò. I pe get get Edwar avek laraz tanzantan apre ki i'n fini sot sot avek bann zanfan ek Zozefin.

"Mon piti ou annan en zoli lakour," Edwar i dir.

"Mersi papa."

"Sa ki plant tou sa mayok ek patat?"

"Remon ki plant tou isi. Mwan ek Zan nou selman fer bann pti loubraz, tel ki aroze e plant fler."

"Sa ou a dir mwan ou'n ganny en vre zonm pa en vagabon."

"Pa tou papa. Deryer lakaz i osi annan nou prop zarden. Les mwan met bann zafer anndan apre nou a fer en pti vizit."

"O.K., me selman mon pa kontan pas dan zarden en dimoun, si i pa'n donn mwan permisyon limenm. Akoz mwan mon pa kontan dimoun pas dan sa ki pour mwan."

"Ki i fer papa? Remon pa en dimoun koumsa li."

"Mon konnen, me lizye dimouni pwazon."

Zozefin i sirprann kan i esey ouver laport. I remarke ki laport i take. Me sa pa trakas li. I konnen ki Remon pa pou anmenn lakle avek li dan travay, sa pa zot labitid. Touzour kan zot sorti, zot met lakle dan en landrwa labitid ki tou manm lafanmiy i okouran, an ka enn i ariv avan.

Zot met lakle anba en bout blok ki lanmenm akote peron. Zozefin i lev sa morso blok, i pran lakle e ouver laport. La lo latatab sa boutey zin vid ek bann sopin labyer vid i swet li labyenveni. "Kwa? Ou a dir mwan Remon ki'n bwar tou sa larak? Pa posib, i'n bezwen fer kek parti yer swar," i dir dan limenm.

I fons deswit dan lasanm pour gete si i pa war personn pe dormi. Dan lasanm son lili ki i ti'n aranze depi yer bomaten i endik li ki personn pa ankor tous li. Depi ki limenm i ti lev asize

lo lili yer avan desann son mark i touzour lanmenm. Pour Zozefin sa laprev pa ase, Monik i vin ankor dan son lespri. I doute ki Remon in kapab anmenn Monik dormi la.

I vizit partou dan lakaz, me i pa war okenn laprev ki kapab konvenk prezans en lot dimoun apar Remon.

"Me kot sa zonm in dormi yer swar? Ou a dir i'n redesann?" i dir dan limenm.

"Zozefin ki arive mon piti? Ki mon tann ou pe koz tousel?" Edwar i demande deor.

"Mon pe vini papa. I annan en keksoz ki pe fatig mwan en pe, vin en kou."

"Ki'n arive ankor?"

"Pa'n ariv naryen me mon pe rode kote Remon in dormi yer e lekel ki'n donn li lanmen bwar tou sa bwar e apre zot in kit tou zot kosonnyen lanmenm lo latatab."

"Pepet enn son zanmi in vin koz koze avek li apre sa pti kankan yer e zot in tap en grog ansanm pour fann traka," Edwar i sipoze.

"En zanmi? Sa mon pa tro krwar. Remon pa frekant dimoun isi e zanmen i pou anmenn okenn zanmi dan son lakaz."

"Be kwa ki pe trakas ou alor?"

"Mon pa konnen, me konmsi sa Monik i fatig mwan. Mon plis ki doute i'n vin isi yer avek Remon, me kot zot in dormi mon pa konnen."

"Mon piti ase enbesil. Remon pa en zonm sitan bet pour li anmenn en fanm dan son lakaz sitan vit e i pa ti menm okouran ki'n arive boner."

"Papa ou pa pou zanmen konnen sa ki pas dan lespri en lot dimoun. Sa ki ou pe dir i paret vre, me kot i'n dormi?"

"Mon piti get byen. Lo sa latatab i montre laprev ki zis en dimoun ki'n bwar tou sa bwar."

"Oli laprev papa?"

“Gete, tou keksoz ki’n servi yer swar i ankor la. Ou remarke?”

“Be wi, konmsi zot ti dan lotel.”

“Be ou pa remarke ki ti napa plis ki en dimoun la e i’n servi zis en ver ki i’n kit lanmenm?”

“Zis en ver?” Zozefin i demande.

“Gete ou menm, la sa ver pe get ou. Ou ankor pe les mansonz Edme ek Anzel fatig ou?”

“Zot ou annan rezon papa. I vre sa parol i ankor pe fatig mwan. Me ou a dir mwan Remon in kapab bwat tousala zis yer swar?”

“I posib. Akoz si ou dir i pa’n dormi lo lili, i posib ki i’n ganny sonmey lanmenm lo latib.”

“Papa, Remon zanmen i annan labitid bwat sa kantite.”

“Mon piti traka i kapab transform son viktim dan nenport fason. Se pour sa rezon ki mon anv i ou pa kit ou lakour avek Remon tousel. Kan en zonm i tousel tantasyon i kapab atak li fasilman. Sirtou i a kapab ganny en labitid bwat ki a difisil pour arete pli tar.”

“Ou a dir mwan zis sa de trwa er-d-tan in kapab transform Remon an en soular?” Zozefin i demande.

“Non, me petet si zot ti reste separe pour plis letan, i ti a vin enn.”

“Anfen mwan mon pa en bwat, mon pa konn tousala me mwan osi sa de trwa minit in byen fatig mon latet.”

“Sanmenm ki mon pe esey eksplik ou. Okontrè pa tard mwan, mon bezwen al larg mon bef pour li bwat delo avan fernwar. Annou al get sa zarden ki ou ti pe dir.” Edwar i dir.

“Zot wi, mon ti’n bliye ou konnen.”

Aprè sa vizit, Edwar i kit Zozefin ek son de piti e i desann kot li. La konman soley in pran lapant kote Por Glo, Edwar pa pou pas dan gran semen, i pas dan en pti santye pour li ariv pli vit kot li.

Prezan son leker i kler. I’n kapab akonplir son pronmes ki i ti fer avek son zann yer. Me i bezwen dakor ki san Zan, petet son

sikse pa ti a’n realiz sitan vit. Petet i ti pou bezwen esper pli lontan avan i kapab koste Zozefin avek en tel konversasyon. Parske pa son labitid pour mel li dan en zafer ki pa konsern li.

Pour Zan sa lensidan ti vreman konsern li direktman e i’n kriy osekour atraver son ansennyan fidel. Prezan i napa traka, i’n ariv sa landrwa kot i santi son lavi ere, sa landrwa kot person pa britaliz li, kot son latet pa pou bat avek laport par lakoler enbesilite.

Kat er in sonnen trant minit pase. Zozefin i dan lakwizin pe tripote e Zan ek Marta zot in pran zot plas labitid kot zot esper zot papa deboukle dan touf prin-de-frans. Yer swar zot pa’n ganny sans anbrase e fouy dan tant. Ozordi zot pa pou mank naryen.

En bon moman aprè, en zonm i penetre touf prin ek en zenn fiy deryer li. Zot pe koze e riye an montan. Parey labitid, Remon avek son sak travay dan son lanmen, me ozordi i pa’n tir son semiz. I pa prese pour ariv kot lakour. I pe pran son letan zot de son konpanyen.

Kot lakour marmay i remark zot papa deswit kan i kit touf prin. Zot pa ni gete lekel sa fanm ki pe swiv li deryer, zis zot kriy for, “La nou papa, la Papa i monte,” e zot pran lakours pour al zwenn li. Remon i sirprann kan i dekouver ki son de zannfan ti pe esper li. I fer en gran souriy kan tou le de i ariv kot li e zot may li dan son lèren.

I donn son sak sa fanm, i bese i pran son de piti dan son lebra e anbras zot. Pour zot trwa sa moman i vreman gou ansanm. I en vre viktwar me pa pour Zozefin ki li osi i’n avans anba langar pour get sa zonm ki i ti pe espere pour ganny en parol depi yer,

apre tou sa roulman. Kan Zozefin i war sa fanm deryer Remon, lenkyetid, laraz, zalouzi ek mank konfyans i form en sel lefe dan son lekor. Zis sa ki i kapab fer se tay dan lasanm. I tonm lo lili an so-d-larm e konmans plere. I pler avek tou son kouraz, pour le moman son sel siporter i son zorye.

“Ki mon pou fer mon Dye? Ki mon pou fer? Mon’n met tou mon konfyans dan en zonm e la i fer mwan war i anmenn en lot fanm lo mwan. Ki mon pou fer mon manman?” E i kontinyen plere tou son kouraz.

Remon ek lezot dimoun i koste lakaz. Zot tann sa plere dan lakaz e zot rekonnet lavwa Zozefin. Vitman Remon i poz son de piti ater e i fons dan lasanm. Lezot osi i swiv li pour gete ki pe pase ki Zozefin pe fer sa leokri.

Arivan dan lasanm, Remon i war son fanm in ser en zorye dan son lebra pe plere. I tonm asize akote Zozefin ki ankor pe alonze e sey poz li kestyon. “Zozefin ki ou gannyen? Kote ki fermal?”

“Les mwan. Pa tyonbo mwan avek ou lanmen ki ou’n tyonbo ou galan avek,” Zozefin i dir.

“Ki galan Zozefin? Aret plere ou a rakont mwan ki’n arive,” Remon i sipliye.

“Manman ek Edme yer ti dir mwan ki ou annan ou fanm kot ou travay. La ozordi ou fer mwan war laverite, ou anmenn li lo mwan kot lakour.”

“Zozefin ou manman ek Edme ti dir ou mon galan avek Flosi?” Remon i demande.

“Mon pa’n dir ou Flosi mwan. Sa ki ti pe monte avek ou Flosi sa?”

“Be lekel Zozefin? La i pe get ou la. Gete si pa ou ser Flosi ki ti pe vin avek mwan pour netway lakaz?” Remon i dir.

Sa parol i fors lebra Zozefin larg sa zorye ki i ti pe kasyet son figir ladan e i dres son latet.

“Zot pou fer mwan fol,” avek en lavwa soulazman Zozefin i dir, an lesan son lekor tonm dan lebra son mari.

“Zozefin mon ker ki pe arive avek ou?” Remon i demande.

“Remon zanmen en dimoun pou fer mwan repet sa enbesilite.”

Flosi i profite i demann Zan ek Marta pour vin avek li deor pour montre li zot zoli zarden. Tou le de ti aksepte pour al avek zot tantin dan zarden. Prezan zot asire ki tou keksoz in retourn normal. Zot napa naryen pour enkyet me Flosi i bezwen reponn enn de kestyon ki pa tro fasil pour li.

“Tant Flosi aköz ou bwar parey granmanman?” Marta i demann li.

“Mon ker mon pa konnen aköz mon’n bwar sa kantite me prezan mon regrete ki mon’n afekte mon lavi ankor zenn,” Flosi i reponn konmsi i pe koz avek en gran dimoun.

“Me aköz ou pa arete? Mon pa kontan dimoun ki sou mwan,” Marta i dir.

“Wi mon ker, tantin pou fer tou sa ki i kapab pour aret bwar pour touzour,” Flosi i promet.

“Pa zis fer nou krwar, mwan osi mon pa kontan dimoun sou. Zot kankan, dominer e lalang. Zot fer nou soufer par zot bann move manni,” Zan i fer sorti.

“Zan, mon’n santi tousala, se pour sa rezon ki mon’n deside pa bwar ankor, me mon pa konnen si mon lalit pou fasil kot mon pe reste dan lakour.”

“Aköz ou pa demann Manman ou a vin reste avek nou isi?” Zan i demande.

“Wi tantin, vin reste kot nou,” Marta i azoute.

“Mon pa konnen si i pou posib me taler nou a koz lo la.”

Letan Flosi pe bezwen reponn kestyon sa de zanfan deor dan zarden, dan lasanm Zozefin ek Remon pe devor kanmarad parey de dimoun ki pa ti'n zwenn pour en lespas de an e zot pa ti'n ganny okenn lezot kontak. Apre trant minit plezir, zot in fatige. Zot lekor in satisfè, zot in reaprouv zot lanmour pour kanmarad.

Dan sa moman lazwa Zozefin i rakont son mari tou sa ki ti arive yer kan son manman ek Edme ti vin sers li, e Remon i refer li remarke ki tou ti mansonz e ti napa en sel mo laverite ladan. Zozefin i santi e aksepte ki i'n fer keksoz dan fou.

"Remon, eskiz mwan pour tou sa ki'n arive, mon krwar mon'n mal fer," Zozefin i dir.

"Akoz ou krwar ou'n mal fer?"

"Mon santi mon'n mal fer pour ekout sa de zans e fer ou soufer pour naryen."

"Mon ser sa in fini, aret mazin li. Apre tou, pa bliye ki ou en imen e imen i fer fot. Sa i enn bann fot ki plizyer fanm in fer. I annan ki'n rearanz zot maryaz me en lot bann pa'n zanmen kapab."

"Mon ker be dir mwan, lekel ki'n donn ou lanmen bwar tou sa bwar yer swar?" Zozefin i demande.

"Ou konnen mon pa menm konnen kimannyer mon'n arive fini tou sa bwar e dormi lanmenm lo latab ziske bomaten?"

Pandan sa letan zot in ariv deor anba lavarang. Zot asize sakenn lo en ban akote kanmarad konmsi zot ti lo menm ban. Zozefin i santi ki son mari ti vreman trakase.

"Mon promet ou ki sa pa pou ariv ankòr," an fiks an son regar drwat dan lizye Remon, Zozefin i dir.

"Mon kontan ou mon leker," Remon i reponn e ser Zozefin

avek li.

Safwasi zot pa pou al pli lwen, bann zanfan pa pou donn zot permisyon. Zot in fini zot vizit dan zarden e prezan zot in vin fer en demann spesyal zot paran.

Zot antre anba lavarang zot tou le trwa e zot asize konmsi zot ti dan en renyon. San ki personn i mazin, Zan i dir, "Pa i gou ler nou byen kot nou e napa personn ki sou pour fer kankan? Pa i gou ler nou manman ek papa i konpran kanmarad? Pa i gou ler en zanfan i santi li konsènen dan desizyon ki son paran i pran? Mon fyer pour annan en paran parey zot, sirtou sa kalite papa ki pare pour adapte li avek nenport sityasyon. Me yer i ti'n vreman sanze ler i ti war granmanman pe kay mon disan," i azoute.

"Zan, i vreman gou pour annan de zanfan parey zot osi, zot vreman fer nou plezir e nou kontan zot en kantite," Zozefin i dir.

"Papa ek Manman, nou de Marta nou'n deside pour ed Tant Flosi dan son lesey pour aret bwar. Pour fer sa, nou pou bezwen zot sipor. Nou sizere ki Tant Flosi i vin reste isi kot nou ziska ki i santi li ase for pour reziste kont lanvi ek tantasyon lakol," Zan i propoze.

"Dakor, Tant Flosi i kapab reste isi otan ki i anvi," Remon i reponn.

"Manman ki ou dir?" Zan i demande.

"Zan ou en piti ki vreman merit ganny felisite," son manman i reponn.

"Tantin ki ou dir, ou dakor?"

"Mon pa konnen kimannyer mon pou remersye ou Zan. Ou vreman entelizan pour ou grandèr," Flosi i reponn.

"Bon depi ozordi Tant Flosi i form parti nou fanmiy," Remon i konklir.

Depi sa zour Flosi ti al sers tou sa ki i ti annan kot son manman e vin reste kot son ser. Avek korperasyon son nouvo fanmiy i ti sevre lalkol pour touzour. Menm si par ler dan Dimans Remon i tap son enn de pti labyer e ofer li en ver, i ti touzour refize. Sat sode i per delo fre. Flosi pa oule met ankor son lanmen anba sa ros ki ti'n deza kraz son ledwa.

Depi sa zour sa fanmiy ti touzour repet en tel rankont dan laform en renyon tou le semenn pour diskite e fer bann propozisyon. Bann konsey barbar pa'n zanmen met dezord ant zot ankor.

* * * * *